

2  
LE III  
**II** \*

BIBL. NAZ.  
VITT. EMANUELE III

**XXVII**

**B**

**95**

NAPOLI

LVII

~~91~~

91

XXVIII \*

B


95.

LVII

99  
91

S

102



DE ANTIQUA  
PICENTUM CIVITATE  
CUPRA MONTANA.

STATISTICAL

TABLES


DE ANTIQUA  
PICENTUM CIVITATE  
CUPRA MONTANA  
MAURI SARTII  
MONACHI CAMALDULENSIS  
EPISTOLA  
Ad V. C.  
JOANNEM FELICEM  
GARATONUM

IN ROMANA CURIA *Advocatum*  
CAROLI S. R. E. CARDINALIS  
SACRIPANTES  
A COGNITIONE *I B U S.*

*Editio altera recognita, & aucta.*



PISAURI 1748. • Typographia Nicolai Gavelli.  
*Superiorum Permissu.*







## LECTORI CANDIDO.

**H**Abes, Candide Lector, novam editionem epistolæ Mauri Sartii Monachi Camaldulensis De antiqua Picentum Civitate Cupra Montana, quam auctor ipse secundis curis ornavit, & auxit. Est aliquid etiam ab eo immutatum, & correctum ex his, quæ vel non satis in prior editione perpensa fuerant, vel nimis inemendata & prælo prodierant. Prima Cupræ Montanæ indicia prope oppidum Massatium agri Æsini observavit P. Sartius sub finem anni M. DCC. XLVI., statimque ea de re scripsit ad Garatonum suum, amicosque præterea multos, quibus & exempla misit antiquæ inscriptionis apud Ferrantios in eo oppido repertæ, in qua Pueri & Puellæ Alimentarii Cuprenses Montani occurrunt. Sed tamen longiusculam hanc epistolam nec ante Junium mensem anni superioris M. DCC. XLVII. absolvere potuit, nec ante eum mensem, qui consecutus est, Venetias mittere, Calogerianæ collectioni inferendam. Quamquam casu factum est, ut, cum epistola hæc ad Cl. P. Calogera perlata est, suæ illius Collectionis tomus XXXVIII. sub prælo esset, tomus vero XXXIX. nimis diu expectandus fuerit, nec

*ante kal. Novembris prima hujus epistolæ exemplaria seorsim ab eo tomo edita, cui tandem inserta est, in publicum exire potuerint. In ea editione dies erat adscriptus kal. Jul. anni superioris M. DCC. XLVII., quo die scilicet ex auctoris manibus emissa fuit; sed eum diem in hac editione abjicere oportuit, ne turpis admitteretur anacronismus. Hic porro unam & item alteram Jani Planci V. Cl. sententiam ex ejus epistola, quam habent Ephemerides Literariæ Florentinæ ad diem kal. Dec. anni superioris, ad trutinam revocari contigit, sed adeo modeste, & cum tanta honoris significatione, ut vir doctissimus, idemque humanissimus non id videatur iniquo animo laturus. Nam quod Literariæ Ephemerides Venetæ ad diem X. Februarii hujusce anni M. DCC. XLVIII. eundem V. Cl., & J. A. Vitalium, Planci amicum, propter vulgatam ab iis inscriptionem Massatiensem, in qua Cupræ Montanæ mentio est, sub nescio quibus verborum ambagibus notant, & carpunt; id vero se inconsulto factum esse sibi ingratissimum accidisse idem P. Sarti-  
 tius confirmat, qui & Planci doctrinam suspicit, & utriusque amicitiam plurimi facit.*



7

# JOANNI FELICI GARATONO

IN ROMANA CURIA ADVOCATO  
CAROLI S. R. E. CARDINALIS  
SACRIPANTES  
A COGNITIONIBUS

MAURUS SARTIUS  
M. CAMALDULENSIS  
S. P. D.

I.



IX dum Massatium veneram, cum accepi literas abs te sane quam amantissime scriptas, in quibus cum multa de valetudine mea, cujus vel tuendæ, vel restituendæ causa secessum hunc Massatiensem optaveram, multa de tota studiorum meorum ratione, quam meo hoc repentino consilio turbatam, ac plane concussam arbitraberis; tum illud postulabas ut scriberem ad te, ecquid rei sit Massatium hoc, cujus ne nomen quidem fortasse ante id temporis audiveras, quæ natura loci, qui situs, & numqua sint hujus loci decora atque ornamenta. Quibus ego statim re-

A 4

scri-

scripsi & esse me hic libentissime, ubi, quantum ex facili conjectura poteram intelligere, meliore in dies valetudine, quam umquam alibi essem futurus, & me jam tum omnem expuisse animi & corporis molestiam, quam Ravennæ, sub cœlo mihi non admodum amico, ante contraxeram. De studiis vero literarum quod ad te scriberem nihil habebam, ac difficile erat quidquam ea de re constituere. Cum enim multa essent, quæ me hortabantur ne quid potius literis in hoc meo secessu habere vellem; tum dehortabantur multa, ac plane deterrebant, illudque inprimis quod, & eo veneram, ubi neque ab optimis libris, neque a doctis hominibus satis præsidii ad eam rem essem habiturus: & jam longo experimento didiceram valetudini meæ cum studiis literarum convenire non posse. Vix itaque fore credo, ut majorem operam literis sim daturus quam quanta necesse est, ne bellum musis indixisse videar. Sed heus tu, videsis ne me beatum hic futurum putes, neque enim satis molesta occupatio deerit juventutis Massatiensis publice in Philosophia instituendæ, a quo ego sane multum abhorreo.

## II.

**R**Estabat extremum illud ut dicerem de hujus loci, situ & natura, ejusque quandam veluti hypotyposim concinnarem. Atque in eo etiam facile tibi per me satisfieri potuisset, si id unum mihi proposuisssem, ut quæ omnium oculis subjecta, & omnium sermone contrita sunt, ea ad te scriberem, præterea nihil. Quis enim est qui, quamvis

vis subito , si quidem hunc locum semel viderit , non copiosissime possit dicere de bonitate agri circumjacentis , de copia , & excellentia rerum omnium , quibus humana vita sustentatur , & alitur ? Unum est , quod incommodum videri possit , loci sitis præaltus , atque editissimus . Sed præterquamquod difficilem admodum accessum non habet , viis nimirum per monticulos alios aliis altiores sensim assurgentibus , propter eam causam tanta est hujus cœli salubritas , nihil ut supra esse possit . Hinc optima Massatiensium ingenia : hinc firmitas , atque is corporum habitus , qui cum in ceteris fere Picentibus , tum vero hic maxime laudari solet : hinc denique cultus quidam , atque urbanitas , paulo fortasse major quam pro conditione loci ; tanta certe , quantam in ejusmodi oppidulis plerumque frustra requirimus . Quam autem opportuno , atque ad aspectum præclaro loco Massatum sit , haud satis verbis dici posse existimo . Totus enim in conspectu est , quantum patet , ager Picenus iste cultissimus ab Appenino ad mare Adriaticum , si eam partem excipias , quæ est Firmum ultra , quo oculorum acies propter longinquitatem vix pertingere potest , & is , quem olim Gallicum appellabant , in cujus ora maritima est Fanum Fortunæ , & Senogallia , qui ager nunc Piceno adjungi solet . Quare , & urbes toto hoc tractu vastissimo sane plures , hinc videre licet ; minora vero oppida , & castra , quæ nullibi fortasse frequentius occurrunt , quam in Picentibus , fere innumera ; ac præter id Adriatici maris tractum duplicem , ingentem unum , ad cujus oram  
urbes

urbes sunt Ancona , Senogallia , & Fanum Fortunæ , minorem alterum , in cuius ora est Lautum ; tum perpetuum Ælis fluvii cursum , qui lato ac sinuoso alveo passibus ab hinc XVII. mil. Adriatico mari illabitur.

## III.

**H**Æc ego ad te scribere poteram , amicissime Garatone , & scripsi etiam pluribus , ut intelligeres posse me hic ita libenter esse , ut , nec urbis , si quod in me esset , nec urbanitatis , quod certe in me semper fuit , desiderio cruciarer . Sed neque his ego etiam contentus , & tua mihi petitio alio spectare videbatur . Cœpi itaque diligenter investigare , adhibitis hujus loci peritioribus , numquid compertum esset de Massatii oppidi origine , & antiquitate , numquod vetus monumentum , numquid esset in his locis vel natura factum , vel arte , quod esset dignum cognitione hominum eruditorum . Sed cum alii alia dicerent , ex omnium sermone intelligebam nihil hic esse , quod vel recenti memoria , vel antiqua opinione admodum illustre existimari deberet . Unum audiivi apud Ferrantios , quæ familia est hujus loci cum primis conspicua , & illustris , vetus monumentum afferari , latinam inscriptionem in grandi lapide , cuius etiam unum , & alterum exemplum accepi , a viris , ut opinio erat , bene doctis , & harum rerum peritissimis , olim exscriptum , quod erat hujusmodi .

IMP. CAESARI  
 DIVI. HADRIANI  
 PARTHICI. NEPOTI  
 DIVI NERVAE PRONE  
 POTI. L. AELIO. HADRI  
 ANO. ANTONINO. AVG  
 PIO. PONTIF. MAX. TRIB  
 POT. XII. IMP. II. COS. IIII  
 P. P. P. VERL. ET P. VEILAT  
 ..... RENTORI  
 C. VIBIVS. ENOES. MON. PONT

Exscriptoribus parum accuratis præter gravissima menda, quæ in postremis versibus hujus inscriptionis nobis obtruserant, L. AELIO pro T. AELIO versu sexto excidit, quod nulla ratione sustineri potest. Eccui enim obscurum est Antonino Pio Imperatori, ad quem hæc inscriptio pertinet, Tito prænomen fuisse non Lucio? Sed postemi tres versus hujus inscriptionis multo etiam sædius corrupti erant. Angelus Tacchius, Presbyter Massatiensis, qui primus omnium, ut opinor, hanc inscriptionem exscripsit *Publium Verlium* nescio quem, & *Publium* item *Veilatium*, Patronos, seu Curatores oppidi Massatii, quibus *Cajus Vibius Enoes* honoris causa hunc titulum posuerit, videre hic sibi visus erat, ut ex ejus schedis intellexeram: nihil ego nisi mera monstra videbam. Itaque archetypum consulendum judicavi, cujus inspiciendi copia cum mihi facta esset per Franciscum Victorium Ferrantium, virum humanissimum, mihi-que jam tum amicissimum, priorem ex tribus illis

lis postremis versibus, in quibus tota hujus tituli sententia consistit, ita legendum esse perspexi:

P. P. PVERI. ET. PVELLAE.

Extremus autem omnium ita conscriptus esse mihi tunc quidem visus est:

CVPRIENSES. MONTANI.

Sed tandem lapide iterum ac saepe acrius, & diligentius inspecto, CVPRENSES omnino legendum esse compertum est. Medium restabat, cujus literæ non solum exesæ & corruptæ, sed prorsus oblitteratæ sunt, si hasce excipias.... ENT. RI. sed ad ejus tamen sententiam eliciendam magno adjumento erat in superiori versu legisse PVERI. ET. PVELLAE. Veniebant enim in mentem *Puellæ Alimentariæ* ab Antonino Pio honoris causa erga Faustina uxorem suam constitutæ, ac tale aliquid de Pueris, ac Puellis istis Cuprensibus suspicabar, qua de re & cum Ferrantio, & cum aliis sum locutus, atque ut conjecturam hanc meam ratione aliqua confirmarem, Ferrantio ipsi ostendisse me memini antiquum nummum rarissimum apud Vaillantium cum epigraphe *Puellæ Faustinianæ*, ad quem explicandum profert Vaillantius ea Capitolini verba de Antonino Pio *Puellas Alimentarias in honorem Faustinae Faustinianas instituit.* (a)

#### IV.

**S**ed fecit tandem auctoritas clarissimi Muratorii, ut me conjecturæ hujus meæ non pœniteret.  
Cum

---

(a) *Vail. Num. Imp. t. 2. pag. 167. & 164. edit. Paris. a. 1692.*



Cum enim ab eruditissimo viro Francisco M. Raphaelio patricio Cingulano, in hac mea librorum inopia quæsissem per literas nuncubi sciret editam esse nostram hanc inscriptionem Massatiensem, rescripsit vir humanissimus editam esse in novo inscriptionum Thesauro clarissimi Muratorii (a), aliquanto quidem minus corruptam, quam vulgo circumferebatur, nam & is etiam ejus inscriptionis exemplum, quale hic ego nactus eram, ante id tempus habuerat, sed mancā tamen, & non leviter vitiatam, ut quivis facile judicare potest; sic enim habent extremi versus tres apud Muratorium:

P. P. PVERI. ET. PVELLAE

..... ENT. RI

.... VIBIVS. ENOES. MON. PNT.

Verſum ultimum emendare non potuit vir doctiſſimus, ſed ſuperiorum duorum primum quidem emendatiſſimum dedit, alterum conjectando ſupplevit, attulitque ad conjecturam ſuam confirmandam eadem illa Capitolini verba, quæ apud Vailantium videram. Sed præſtat Muratorium ipſum audire; poſt ubi enim dixit in eo verſu qui ante ultimum eſt, legi commodè poſſe ALIMENTARI, ita inquit: *poſtremæ lineæ divinando potius, quam certa ratione exſcriptæ fuerunt. Et reipſa Antoninus Pius, uti ſcribit Capitolinus, Puellas Alimentarias in honorem. Fauſtinæ, Fauſtianas conſtituit, quæ videlicet ex ærario alebantur. In honorem quoque Hadriani Pueros Alimentarios conſtituiſſe credendus eſt.*

V.

---

(a) Tom. I. Col. CCXXXVIII. n. 2.


## V.

**D** Ubium non est igitur quin *Pueri*, & *Puella* ALIMENTARII hic designentur, præsertim cum & ejus vocis nonnulla vestigia supersint, nec alia vox ulla ibi commode inseri possit. Qua de re tota ut quivis facile judicare possit, nostræ hujus inscriptionis exemplum, quam diligentissime expressum, hic subjicere placuit. Sed quod Muratorius existimat hic designari Pueros Alimentarios ab Antonino Pio in Hadriani patris honorem institutos; idque hac una ratione probat, quod cum Antoninus idem Puellas Alimentarias instituerit, quæ Faustinianæ dicerentur, credendus sit in Hadriani quoque honorem Pueros Alimentarios constituisse; ego id quidem vix negare ausim propter summam viri doctissimi auctoritatem, sed tamen vereor ne satis firmum sit argumentum ex nostra inscriptione petatum. Ubi enim considero multo ante id tempus pueris & puellis, egenis parentibus natis, alimenta passim in Italiæ civitatibus, ex publico constituta fuisse, non video cur inscriptionem nostram interpretari oporteat de pueris in Hadriani honorem institutis, deque puellis ex Faustinae nomine appellatis. Ut enim in aliis Italiæ civitatibus, ita apud Cuprenses Montanos esse poterant vel ab aliis principibus ante Antoninum Pium, vel ab ipso demum Antonino Pio constituti pueri & puellæ, quibus alimenta publice suppeditarentur. Latissime enim patebat in Italia beneficium istud optimorum principum ad liberorum educationem. Ut enim veris-

IMP CAES  
 DIVI HAD  
 FR IT  
 PA CI  
 DIVI NERVAE  
 POTI AELIO  
 ANO ANTONI  
 PIO PONTIF M  
 POT XII IMP II  
 PP PVERE  
 AVENT  
 CVPR ENSES

Altum palm. 4.8. Latum palm.





rissime inquit Reinesius in alimenta puerorum ingenuorum puellarumque, annui sumptus certarum summarum facti sunt, non in urbe tantum, sed per totam Italiam in coloniis, & municipiis. (a) Neque vero principum dumtaxat, sed privatorum etiam liberalitate, præclarum hoc institutum alebatur. De Plinio enim nepote manifestum est contulisse illum in alimenta puerorum, & puellarum non modicam pecuniæ summam, de se enim, ut alia ejus rei argumenta præteream, scriptum ipse reliquit, *se pro quingentis millibus nummum, quæ in alimenta ingenuorum, ingenuarumque promiserat, agrum ex suis longe plus a fœdori publico mancipasse.* (b) Eius pecuniæ curandæ causa erant in Italiæ civitatibus *Quæstores Alimentorum* dicti, quorum non rara mentio est in antiquis lapidibus, ubi & *Præfecti Alimentorum* quandoque occurrunt, & *Alimentorum Curatores*, & alicubi etiam *Villicum ab alimentis* legimus apud laudatum Reinesium, aliosque. (c)

## VI.

**S**unt qui Nervam eximii hujus instituti auctorem ferant. (d) Sed Trajani liberalitas in hoc maxime emicuit, ut Plinius & Dio, sive ejus epitomator Xiphilinus, & inscriptiones antiquæ, & nummi sane plurimi testantur. *Hæc prima*, inquit Plinius, *parvulorum civium vox aures tuas imbuat,*

buit,

(a) Reines. in 125. l. & 24. VI. &c.

(b) Apud Reines. loc. cit., & lap. Mediol. apud Grut.

(c) Reines. loc. cit. Vid. & Cl. Oliver. ad marm. Pisaur. XXXVI. Pratil. inscrip. de Jove Hort. in Opus. Calog. t. 28. &c.

(d) P. Diac. ap. Reines. loc. cit.

buit, quibus tu daturus alimenta hoc maximum præstitisti ne peterent. (a) Xiphilinus autem : civitatibus Italiæ multa largitus est ad educationem liberorum, in quas magna beneficia contulit. (b)

Ex antiquis vero inscriptionibus mirificam hanc Trajani liberalitatem indicantibus, quas videre licet apud inscriptionum Collectores, principem omnino locum ea obtinet, quæ non ita pridem reperta est in agro Placentino, cujus particulas aliquot nunc tantummodo vidimus, integram vero, & erudito commentario illustratam expectamus a V. Cl. Ludovico Antonio Muratorio. De nummis vero antiquis eadem de causa percussis quid attinet dicere? Sunt enim notissimi, & antiquariorum manibus ubique teruntur. Ex his nonnullos protulit Mediobarbus cum ea celebri epigraphe ALIM. ITAL. S. P. Q. R. OPTIMO. PRINCIPI. quibus cum sit adscriptus IV., V., & VI. Trajani Consulatus, non solum initio principatus, quod ab auctoribus didiceramus, sed multo post etiam nova beneficia optimum principem in Pueros, & Puellas Alimentarios contulisse manifestum est: quod multo etiam magis declarat Auximanz inscriptionis fragmentum ejusmodi:

... NERVAE. F. NERVAE

.... O. PONTIFICI, MA

..... MP. VI. COS. V

..... NIFICENTIAM. SVAM

....

(a) In Panegy. c. 26.

(b) In Trajano.

.... SVBOLEMQ. ITALIAE

..... IT. MVNICIPIVM

..... (a)

.....

Vides hic Trajanum non modo COS. V. dici, sed etiam IMP. VI., qui honos ei tributus non est ante Tribunitiam Potestatem XII. hoc est Imperii annum XII., ut ex inscriptione a Grutero edita observat Fabrettus. (b)

## VII.

**P**erpetuum hoc Trajani studium erga *Italiae sobolem*, ut in superiori inscriptione appellatur, æmulatus est Trajani successor Hadrianus, ut est apud Spartianum. Sic enim de Hadriano: *Pueris ac puellis, quibus etiam Trajanus alimenta detulerat, incrementum liberalitatis adjecit.* (c) Quis autem crediderit, quod Hadrianus, vel amoris, & pietatis causa erga civitates Italiae, vel honoris, & religionis erga Divum Trajanum patrem fecisset, non id egisse similibus de causis Antoninum Pium, quem nemini superiorum principum pietate, & liberalitate concessisse novimus? Quamquam non id conjectando solum assequimur, sed etiam antiquis monumentis comprobatur. Ejusmodi est inscriptio perbrevis Sextini reperta a Rubenio, Gorio, & Muratorio (d) edita:

B.

DI-

(a) *Ap. Fabret. Inscript. cap. 10. 91. & Murator. pag. CCXXX. 3. Extat hodieum Auximi ad Divæ Lucie.*

(b) *De Col. Traj. pag. 290.*

(c) *In Hadriano.*

(d) *Pag. CCXXXVIII. 4.*

DIVO  
ANTONINO  
AVG. PIO  
ALIMENTARI.

Cur enim pueri Alimentarii honorem hunc Antonino Pio detulerint, cum esset in Divorum numerum relatus, hoc est post mortem, nisi ut beneficiorum memoriam, quæ sibi, dum esset in vivis, contulisset, æternitati commendarent? Huc etiam facit alia inscriptio mutila apud Urbinates reperta, atque ab iisdem Rubenio, & Muratorio (a) vulgata:

T. AELI. HADRIANI  
ANTONINI. AVG  
PII. PONT. MAX  
TRIB. POT. XIII  
IMP. II. COS. IIII. P.P  
FILIO  
PVERI. ET. PVELLAE  
ALIMENTARI

Cum Antoninus Pius *Tribunitiam Potestatem tertiamdecimam*, hic expressam, M. Aurelius, Antonini filius, quartam, vel quintam numerabat, idque in hac inscriptione præteriri non debuisset, si quidem ad M. Aurelium pertineret, ut vero propius visum est Cl. Muratorio. Notat enim *illud FILIO sustineri non posse, nisi inscriptionem referamus ad M. Aurelium ab Antonino adoptatum, & nondum ad imperium evectum*. Ego æque ad L. Verum referri posse crediderim, quem auctore Capitolino scimus absque alio honore, quoad vixit Antoninus Pius, in  
Pala-

---

(a) Loc. cit.



Palatio egisse, præterquamquod AVGVSTI FILIVS diceretur; cum alias M. Aurelius ad an. 147. Imperium Proconsulare, & Tribunitiam Potestatem acceperit, Antonino Patre Trib. Potestatem nonam agente. Sed quid si in marmore ipso *Tribunitia Potestas* XIII. non legatur? Ego id multum vereor; alios enim video Inscriptionem hanc sine Tribunitiæ Potestatis numero in hunc modum protulisse, quemadmodum etiam ego illam a doctissimo, & humanissimo Auximanorum, & Cingulanorum Antistite Pompejo Compagnono acceperam:

T. AELI. HAD....

ANTONINI.....

PII. PONT. M...

TRIB. POTE....

IMP. II. COS. IIII. P.P

FILIO

PVERI. ET. PVELLAE

ALIMENTARI

Sed hæc alii viderint, siue enim M. Aurelium, siue L. Verum hic designari malis, satis vero simile videtur non alia de causa hoc ei monumentum a *Pueris & Puellis Alimentariis* positum fuisse, quam propter, insigne aliquod beneficium ab Antonino Pio acceptum, ut scilicet in colendo Filio suam Patri devotionem probarent.

## VIII.

**C**Um ergo Antoninus Pius Puellas Faustianas in uxoris suæ honorem instituit, ingens erat numerus puerorum, puellarumque tota Italia, qui

ejus, & superiorum principum liberalitate alebantur. Post Antoninum Pium M. Aurelium ejus successorem legimus in honorem Faustinae junioris uxoris suae, post ubi a senatu obtinuisset, ut divinos honores eidem decerneret, *novas Puellas Faustianas* de ejus nomine dictas instituisse. *Petiit a senatu*, inquit de Aurelio Capitolinus, *ut honores Faustinae, ædemque decernerent laudata eadem.... novas Puellas Faustinianas instituit in honorem uxoris mortuae. Divam etiam Faustinam a Senatu appellatam gratulatus est.* Alexander quoque Severus, qui fuit in matrem Juliam Mammæam pietate mirifica, & plane singulari, non puellas modo, sed etiam pueros in ejus honorem instituit, deque ejus nomine appellari voluit, ut est apud Lampridium, a quo etiam accipimus tale aliquid vel fecisse, vel quidem certe cogitasse Macrinum, ut Pueros Antoninianos, de Antonini Diadumeniani filii nomine dictos, ad Romanorum benevolentiam captandam institueret. Ut igitur Puellæ Faustinianæ a M. Aurelio honoris causa in Faustinam juniorem institutæ, & Mammæanæ Puellæ, ac Pueri, quos Alexander Severus Juliæ matri dedicavit, & Antoniniani Pueri a Macrino vel instituti, vel destinati, alii prorsus erant *a Pueris & Puellis Alimentariis* passim in civitatibus Italiæ institutis; ita inter Puellas Faustinianas ab Antonino Pio in uxoris Faustinae honorem institutas, & eosdem *Pueros ac Puellas Alimentarios* plurimum interfuisse manifestum est: præsertim cum istiusmodi *Pueri & Puellæ Alimentarii* non alia de causa instituti fuissent, quam ut commodius, honestiusque educari possent, atque ut optimorum principum libera-

beralitatem civitates Italicae experirentur, quemadmodum supra, Xiphilino auctore, accepimus. At Puellae Faustinianae in honorem Divae Faustinae constitutae erant, eaque res non tantum ad Antonini liberalitatem, sed quodammodo etiam ad religionem pertinere videbatur, quod etiam de novis M. Aurelii Puellis Faustinianis dicendum est; neque enim hunc honorem alterutri Faustinae, cum adhuc in vivis esset, uxorii principes detulerunt, sed postquam utraque fato functa, atque inter divas relata est, & templum, aliosque honores divinos habuit. Quam enim religiose Antoninus Pius Faustinae suae memoriam coluerit, quam tertio imperii anno (a) amiserat, & auctores scriptum reliquerunt, & numismata antiqua sane plurima (b) testantur, eo imperante percussa, in quibus & Faustinae apotheosis, sive *Consecratio*; & *Aedes Divae Faustinae*, ejusque *Aedis Dedicatio*; & Thensae ab elephantis ductae cum Divae Faustinae imagine sub Cereris habitu; & Junonis Lectisterium Faustinae accommodatum; & Faustinae item imago cum insignibus *Dianae Luciferae*, aut *Matris Deum*, aliaque symbola divinitatis expressa conspiciuntur. Par studium colendae Faustinae Junioris in Marco Aurelio fuit, qui, & *novas Puellas Faustianas* ejus honoris ergo instituit, & *a senatu petiit, ut honores Faustinae aedemque decernerent*, (c) postquam ipsa quoque in divarum album relata fuerat.

B 3

IX.

(a) *Capitolin. In Pio.*(b) *Vaillan. Num. Imp.*(c) *Cap. in M. Aurel.*

## IX.

**Q**uos ergo in nostra inscriptione *Pueros, & Puellas Alimentarios* legimus, non video cur necesse sit de Puellis Faustinianis, deque Pueris Alimentariis in Hadriani honorem, ab Antonino constitutis cum Cl. Muratorio intelligere; præsertim cum de hisce Pueris honoris causa erga Hadrianum patrem ab Antonino institutis nullum antiqui auctoris testimonium, nullum idoneum monumentum a viro eruditissimo afferatur. Quod si revera apud nostros Cuprenses Montanos Pueri, & Puellæ ejusmodi Hadriano, & Faustinae devoti, & dicati fuissent, ad eosque ea inscriptio pertineret, quemadmodum in nummis *Puellas Faustianas* legimus, ita, & in ea Inscriptione ejusmodi appellationem usurpassent, quæ & Antonini beneficium, & Hadriani, ac Faustinae memoriam declararet. Cum enim Cuprenses Montani ea Inscriptione Antonini beneficium testatum publice voluerint, non est cur ejusmodi appellatio prætermittenda fuerit, & Antonino gratissima, & Cuprensi populo supra quam dici possit honorifica. Quoniam igitur Pueri, & Puellæ Cuprenses Montani usitato & communi more *Alimentarii* dicuntur, alterutrum consequi existimo, vel ante Antoninum fuisse apud Cuprenses Montanos ingenuos Pueros & Puellas publico alimento superiorum Principum munificentia donatos, quos Antoninus novis muneribus auxerit, ut & Hadrianum erga Pueros & Puellas Alimentarios a Trajano institutos fecit.

fecisse constat; (a) vel Antoninum ipsum Pueris, & Puellis Cuprensibus Montanis tunc primum alimenta ex publico decrevisse; cujus beneficii memoriam nostra hac inscriptione, addita insuper vel statua, vel insigni aliquo monumento, æternitati commendarunt.

## X.

**E** Didit nuper hanc inscriptionem V. Cl. Janus Plancus in Epistola, quam referunt Ephemerides Literariæ Florentinæ A. D. Cal. Dec. anni superioris MDCCXLVII., atque is quoque in eo versu, qui ante ultimum est, cum Cl. Muratorio vocem ALIMENTARI supplendam esse judicat, ea nimirum conjectura usus, quam a Muratorio usurpatam vidimus: quamquam aliquid præterea eidem Viro Clarissimo attribuat, quod ab ejus mente alienissimum puto. Ait enim sapienter fecisse Muratorium cum ibi ALIMENTARI restituendum esse monuit, propterea quod, Muratorio ipso fatente, Antoninus Pius in Faustinae honorem alia Puerorum, Puellarumque Alimentariorum, quos Faustinos dixit, collegia instituerit, quemadmodum ab Julio Capitolino accipimus. Addit V. Cl. id etiam ab Hadriano factum fuisse, ut inscriptiones, ibidem a Muratorio editæ, demonstrant, (b) sed neque ad Puellas Faustianas

B 4

ullo

---

(a) *Spartian. loc. cit.*

(b) E saggiamente pure soggiunge (il sign. Muratori) opinor ego ALIMENTARI restituendum esse, giacchè si fa, come egli seguita a dire, che Antonino Pio per testimonia di Capitolino istitui in onore di Faustina sua moglie altri

ullo modo pertinet inscriptio nostra, ut supra demonstravimus; neque ex eo quod Antoninus Pius Puellas Faustinianas alicubi instituerit, rite colligi potest *Pueros & Puellas Alimentarios* ab eo institutos fuisse apud Cuprenses Montanos; neque Muratorius, si recte teneo, umquam dixit Pueros Faustianos ab Antonino institutos fuisse, neque id sane dicere poterat Julii Capitolini auctoritate permotus, qui cum Puellas Faustianas memoret, quas etiam ex nummis antiquis noscere licet, de Pueris Faustianis omnino silet. Ac Muratorius sane parum sibi constaret, si tale aliquid dixisset, quippe qui suspicatus erat Pueros Alimentarios, qui in hac inscriptione occurrunt, in Hadriani patris honorem ab Antonino Pio fuisse institutos ob eam causam, quod pari pietate in uxorem Faustina, Puellas Alimentarias de ejus nomine dictas instituisset. Quod autem addit Cl. Plancus Hadrianum quoque Pueris, & Puellis Alimenta decrevisse, id vero certum exploratumque est, sed antiquas inscriptiones, ejus rei testes, frustra apud Muratorium eo loco requirimus.

## XI.

**I**dem præterea V. Cl. hosce *Pueros & Puellas Alimentarios* haud ab iis dissimiles fuisse existimat  
qui

---

altri Conservatori di fanciulli, e fanciulle alimentari, che chiamò Faustiniani; cosa, che era stata fatta anche avanti da Adriano, suo antecessore, istituendo anch' egli di questi fanciulli e fanciulle alimentari, come apparisce da altre lapidi „portate nel medesimo luogo dal sig. Muratori. *J. Planc. in ep. cit.*

qui in nostris orphanotrophiis aluntur, ut ea verba demonstrant, quæ paulo ante ex laudata ejus epistola attulimus, & alia item quæ hic subjicimus (a). Sed dabit mihi hanc veniam vir humanissimus, verique amantissimus, ut dicam non videri mihi cum orphanis nostrorum temporum, puerisque incertis parentibus natis, & in orphanotrophiis ad certam ætatem alitis comparari posse *Pueros* & *Puellas Alimentarios*, quos & civium Romanorum filios fuisse constat ex auctoribus ante allatis, nec una omnes in domo communiter, sed domi suæ a parentibus, more aliorum civium Romanorum liberaliter educari mos erat, secus atque in nostris orphanotrophiis fieri videmus. Ego sane ejusmodi pueros, puellarumque cœtus apud Romanos publice constitutos fuisse, numquam legisse memini, nec ullum ejus rei indicium uspiam reperisse. Ut enim omittam nihil ejusmodi ex auctoribus antiquis, qui de hisce Pueris, & Puellis Alimentariis agunt, colligi posse; inscriptiones Romanas propemodum infinitas ubique habemus, ex quibus, magno eruditio- nis emolumento, plurima intelligere licet de moribus & institutis Romanorum, de religione, de publicis & privatis operibus, de magistratibus, deque universa ejus populi politia. In his plurima sunt de *Pueris* & *Puellis Alimentariis*, & *Alimentorum Curatores*, *Quæstores*, *Præfectos*, aut alio quovis nomine

---

(a) I quali fanciulli e fanciulle alimentari con l'erario pubblico dovevano essere simili a quegli orfani, ed esposti maschi, e femmine; che si alimentano negli spedali, ed in altri conservatori, che si trovano ora quasi per tutte le nostre città cristiane. *Ex laudat. Ep. Cl. J. Planci.*

ne nuncupatos Alimentariæ pecuniæ curandæ præpositos, sæpe memoratos videmus, ceteraque de genere hoc. Verum de his puerorum & puellarum cœtibus, collegiis, orphanotrophiis, de eorum rectoribus, magistris, pædonomis altum ubique silentium, quamquam tota Italia huiusmodi pueri & puellæ ex publico alebantur. Est præterea inscriptio vetus apud Muratorium (a) *C. Alfio Alimentorum Quæstori a Pueris & Puellis Alimentariis, ut puto Affisienfibus, posita Consensu Parentum*:

C. ALFIO. C. F. SERGIA  
 CLEMENTI MAXIMO IV VIR. I. D.  
 AEDILIQ. PECVNIA RV M  
 PVBLICAR. Q. ALIMENTOR.  
 PVERI ET PVELLAE QVI  
 EX LIBERALITATE SACRATIS  
 SIMI PRINCIPIS ALIMEN  
 ACCIPIVNT CONSENSV  
 PARENTVM EX AERE  
 CONLATO  
 . . . . . C. L. D.

Quid autem hic parentum consensus, si pueri & puellæ una omnes in quibusdam veluti orphanotrophiis, longe ab oculis & cura parentum educabantur? Non erat id perficiendum consensu parentum, sed ejus a quo regebantur, quique orphanotrophio præerat. Accedit quod non eadem omnino singulis pueris & puellis decreta erat alimentorum mensura, sed alia legitimis, alia spuriiis, alia pueris, alia puellis. Legimus

---

(a) Pag. CDLXIX.



gimus id apertissime in inscriptione Placentina, quam supra memoravimus, cujus particulam, quæ ad hanc rem facit, hic juvat proferre, primum mihi ab amplissimo viro communicatam Pompejo Compagnono, Auximanorum & Cingulanorum Antistite clarissimo & doctissimo, quem hic iterum honoris causa nomino, ac postea visam inter ephemerides literarias Florentinas, quæ ejusmodi est: **IN**

LEGITIMI N. CC|XV. SINGV|OS HS. XVI.

N. F. HS. XLVII. X|. N.

LEGITIMAE N. XXXIV. SING. HS. XII.

N. F. HS. IV̄DCCCXCVI.

SPVRIVS. I. HS. CXLIV. SPVRIA. I. HS. CXX

SVMMA. HS. LIICC. QVAE FIT VSV  
RA 8 ~ 8. SORTIS SVPRASCRIBTAE

Apud Cl. Lamium in ephemerid. Florentin. puero-  
rum numerus est CCXLV, qui omnino tenendus est,  
ut inito calculo ejus pecuniæ, quæ singulis adscri-  
bitur, facile intelligi potest. Porro habemus in hac in-  
scriptione quorundam prædiorum obligationem ob HS.  
1044006., ex quorum usura quincunce quotannis

HS. LIICC, hoc est HS. 52000. conflari debe-  
bant, eaque summa in alimenta puerorum & puel-  
larum, ut opinor, coloniæ Placentinæ, eroganda  
erat ex indulgentia Trajani Imperatoris. Sic au-  
tem ea summa distribuenda erat ut pueris legiti-  
mis CCXLV. contingerent HS. XLVII. XL. hoc est HS.  
47040. puellis item legitimis HS. IV̄DCCCXCVI.

hoc

hoc est HS. 4896. spurio uni HS. CXLIV. & spuriae item uni HS. CXX. Itaque æquali distributione facta singulis pueris legitimis debebantur quotannis HS. CXCII., puellis autem legitimis HS. CXLIV. Sed quid est, inquires, quod pueris legitimis HS. XVI. decernuntur in singulos, puellis autem singulis HS. XII.? Id ita omnino intelligendum esse consentiunt eruditi, ut duodecies in anno, ac fortasse mensibus singulis fieret alimentorum distributio ab alimentariae pecuniae praefectis; si enim summam HS. CXCII., quam singulis pueris contigisse diximus, duodecim in partes æquales diviseris; quolibet mense, vel duodecies certe in anno pueris singulis comperies distribui debuisse HS. XVI., ut in ipsa inscriptione notatum est, eademque partitione facta puellas singulas duodecies in anno HS. XII. accepisse. Ac HS. XII. spurius item accipere debuit in menses singulos, spuria vero HS. X.

## XII.

**Q**Uoniam igitur pueris & puellis non eadem omnibus Alimentorum subsidia constituta erant, non video quomodo fieri potuerit, ut una omnes in domo, ut in orphanotrophiis nostris mos est, communiter educarentur: praesertim cum alimentorum distributio, vel singulis mensibus, vel certe duodecies in anno fieret, ut non obscure in rarissima hac inscriptione Placentina indicatur. Quod si ubi legimus Romanos principes Pueros & Puellas Alimentarios instituisse, id oporteret de quibusdam veluti orphanotrophiis interpretari, vercor ne nimis tenuis futurus fuisset  
hujus

hujus Placentini orphanotrophii census, nec par alendis pueris & puellis ducentis uno & octoginta, cum tanto magistrorum, præfectorum & fervorum utriusque sexus numero, quanto opus fuisset ad liberalem eorum educationem. Quid plura? Ipsi veteres nummi, antiquitatis testes incorruptissimi, rem hanc veluti sub oculos ponunt. In his enim sub variis typis pueri Alimentarii occurrunt, sed plerumque tamen ætate admodum infantili exhibentur, qua nimirum ætate e parentum sinu sine quadam inhumanitatis nota non potuissent abduci, ut aliena cura educarentur. Iidem nummi, si quid video, morem produnt legendi ejusmodi pueros & puellas ad alimenta capienda. A parentibus enim Imperatori sistebantur, antequam eorum nomina in Alimentariorum album referrentur, & in publicis tabulis inciderentur. Videmus id in nummis Faustinae senioris cum ea celebri epigraphe *Puellae Faustinianae*; in quo matronæ Romanæ puellulas ante Imperatorem adducunt in suggestu stantem, & nomina earum, quæ ad frumentationem admittit matronæ Romanæ eas scribenti distantem, ut notat ad ejusmodi nummum Vaillantius: quamquam non hic agitur de frumentaria largitione, ut indicare videtur Vaillantius, sed de Alimentaria liberalitate, quæ duo plurimum inter se distant. Mitto alios nummos, qui apud auctores, vel in cimeliis videri possunt, ac tantum addo non id solum ex nummis, sed ex celebri Plinii loco in Trajani Panegirico clarissime intelligi: *Tu ne rogari quidem, inquit, sustinuiſti, & quamquam lætissimum oculis tuis eſſet conſpectu Romanæ ſobolis impleri, omnes tamen antequam te viderent, adirentve, recipi,*

*recipi, incidi jussisti, ut jam inde ab infantia parentem publicum munere educationis experirentur. Possem alia congerere ad hanc Cl. Planci opinionem infirmendam, sed vereor ne jam nimis multus fuerim in re clarissima. Redeundum igitur ad inscriptionem Cuprensem, a qua digressi sumus.*

## XIII.

**A**Tque huic quidem inscriptioni multum debemus, ex qua præclarum hoc Antonini Pii factum de *Pueris, & Puellis Alimentariis* apud Cuprenses Montanos vel institutis, vel nova liberalitatis accessione amplificatis intelligimus; sed multo etiam magis debeamus quod Cupræ Montanæ, anti-quæ Picentum civitatis, situm ante hoc tempus perperam alibi quæsitum & constitutum, ejus indicio certissimo definire licet. Neque enim dubitare jam audeo quin montanum hunc tractum, qui Æsi flumine alluitur, & Cingulum inter ac ipsum Æsim continetur, olim Cuprenses, Montani appellati, habitaverint, atque ibi Cupra Montana, vetustissimum Piceni oppidum fuerit, ubi hæc inscriptio effossa est, passibus ducentum infra Massatium Æsium versus. Sed itane, inquires, unius inscriptionis indicium valebit contra omnium eruditorum sententiam, quorum nemo unus est, qui Cupram Montanam non longissime a Massatii finibus abfuisse dicat? Ego vero, neque enim diffiteor, ubi primum in hanc inscriptionem incidi, quæ eruditorum sententia esset de Cupræ Montanæ situ, haud satis perspectum habebam; sed multum tamen momenti in ea ipsa inscri-

scriptione esse videbam ad illud vel definiendum , vel confirmandum. Sed cum optime intelligerem , nihil temere pronuntiandum in re admodum antiqua , & fortasse nihilominus obscura , cœpi , te etiam mone[n]te , amicissime Garatone , ad quem ea de re scripseram , sedulo investigare , esset ne Cupræ Montanæ situs ita cognitus & perspectus , novis ut inquisitionibus nullus esset locus relictus. Quid ego consecutus sim judicabunt alii , tuque in primis , qui ad levem hunc laborem suscipiendum mihi auctor fuisti .

## XIV.

Fuit itaque multorum opinio Cupram Montanam , apud antiquos auctores satis notam , civitatem eo loci fuisse ubi nunc Corinaltum , non ignobile oppidum agri Senogalliensis , alto atque amœno loco assurgit . Atque hæc opinio vel auctores , vel assertores habuit Jacobum Guastaldium , Sebastianum Munsterum , Hieronymum Ruscellium , & Joannem Malumbram , si quæ fides habenda est Vincentio Cimarellio ( a ) scriptori non admodum accurato ; nam eos ego auctores ad manum non habeo . Tantum novi Ruscellium in sua Ptolemæi interpretatione latina pro Cupra Montana Corinaltum vertere . Sed neque ejus , neque aliorum , quos ante nominavi , quidquam me movet auctoritas , quos tota , ut ajunt , via errare perspicuum est . Corinaltum enim ex Suasæ reliquiis , apud antiquos Geographos non obscuræ civitatis , quæ ad Suasanum flumen ,  
nunc

---

( a ) *Hist. Gal. Senon. l. 3. pag. 4.*

nunc *il Cesano*, sita erat, originem traxisse videtur, ut monumenta ab ipso Cimarellio utcumque congesta declarant. Quæ autem, malum, dementia est, Cupram Montanam in Gallis Senonibus, atque adeo media in Umbria quærere, quam in Picentibus antiqui scriptores apertissime collocant, ut post paulo videbimus? Illud etiam perridiculum est quod audio, quosdam esse repertos, qui Cupram Montanam cum Treja, alia quadam antiquorum Picentum civitate, miscere & confundere ausi sint, ut ex duabus hisce civitatibus, & loco, & nomine omnino diversis, unum Montecli, vulgo *Montecchio*, conflatum oppidum voluerint. Non defuere etiam qui putaverint, Cupram Montanam fuisse in vicinia Laureti, vel in ipso Laureti loco, quod oppidum est toto orbe propter Nazarenæ domus religionem celeberrimum; sed hæc opinio, uti & superiores, idoneis caret auctoribus, & monumentis.

## X V.

**H**Actenus itaque probabilior visa est eorum sententia, qui Cupram Montanam, ubi nunc Ripa Transona, collocandam existimant, Firmum inter & Asculum, e regione Cupræ Maritimæ, notissimæ item antiquorum Picentum civitatis, quam multi ibi fuisse dicunt, ubi nunc oppidum a nostris dictum *le Grotte a Mare*. Ita fere Geographi eruditiores, & scriptores clarissimi Cluverius (a) Cellarius,

---

(a) *Ital. antiq. l. II. c. XI.*

rius, (a) Holstenius, (b) Brietius, (c) Harduinus, (d) Bandrandus, (e) & nuperrimus Paciaudus (f) cum auctore Dissertationis *de nonnullis Antiquitatibus apud Ripam Transonam repertis*, quæ est inter Dissertationes Academiæ Cortonensis (g). His omnibus præiverant Joannes Garzonius Bononiensis, qui ad annum 1447. libellum scripsit de rebus Ripanis, editum postea Anconæ an. 1576., & Nicolaus Peranzonius de Monte S. Mariæ in Casfiano in libro, quem de laudibus Piceni latine scripsit sæculo XVI. ineunte, quem nuper manu exaratum vidi apud humanissimum antistitem Auximum. Paciaudi vero peculiaris est sententia. Disseruit is admodum copiose & erudite de Ripæ Transonæ antiquitatibus in dissertatione, quam ante citavi; sed is tamen in ea opinione fuisse videtur, si quidem ejus mentem assequor, non duplicem ut Cupram, sed unam eandemque fuisse existimaverit, veluti bifariam divisam, ita ut quæ pars loco inferior esset ad mare, Maritima, quæ autem superior, Montana diceretur. Enimvero cum ei persuasum esset Cupram Montanam ad Ripæ Transonæ locum fuisse, de Maritima vero non ambigeret in iis locis esse collocandam, alteram ab altera non distinguit, ac monu-

C

menta

(a) *Geograph. antiqu. l. II. c. IX. sec. II. n. 269. & 285.*

(b) *Apud Cellar. loc. cit.*

(c) *Lib. 5. tom. 2. pag. 916. edit. Paris. 1669.*

(d) *In cap. 13. l. 3. Plin. Hist. Nat.*

(e) *Verbo Cupra.*

(f) *Dissert. de Antiquit. Ripæ Trans. in Miscellan. Venet. tom. 6.*

(g) *Dissert. Acad. Corton. tom. 1. Dissert. V.*

menta plurima Cuprensum ita assert, & eruditissime illustrat, quasi ad unam eandemque Cupram pertineant. Sed Cluverii tamen aetate non levem fuisse eruditorum dissensionem de situ Cupræ Montanæ ex ipso Cluverio accipimus (a), cui vero propior visa est Ligorii sententia Cupram Montanam ad Ripam Transonam figentis. Id argumento est per eos dies satis certum monumentum non esse repertum, quo verus Cupræ Montanæ situs definiri posset. Quare mirum non est Holstenium, ut in re nondum bene perspecta, & constituta, aliquantulum discessisse a Cluverii, & passim per eos dies recepta sententia. Scribit enim se verum Cupræ Montanæ locum indicisse ab Laurentio Azolino, Episcopo Ripano, qui nimirum locus aliquot passuum millibus esset supra Ripam Transonam. (b)

## XVI.

**N**Ullam itaque certam rationem secutos homines etiam eruditissimos existimo, ut Cupram Montanam, ubi nunc est Ripa Transona, collocarent, sed conjecturas tantum probabiles, & multum sane infirmas. Cum enim duplicem Cupram in Picenti-

---

(a) Cognomen hoc oppido inditum fuisse ad discrimen alterius, quod in litore dicebatur Cupra Maritima, supra dixi. Ex hujus igitur situ colligo Montanam fuisse in proximis montium jugis. Quam varia sint doctorum virorum de ejus loco opiniones, Ligorii maxime placet sententia, qui id vult esse oppidum, quod supra Cupram Maritimam, sive ut vocant, le Grotte, montana regione, edito colli impositum vulgari appellatione est Ripa Transona Episcopali dignitate nobilis. Cluv. loc. cit.

(b) Ad cit. Cluver. loc. pag. 137.



centibus olim fuisse compertum haberent, alteram a scriptoribus Maritimam, Montanam alteram appellatam, & de Maritima quidem vulgo persuasum esset ibi fuisse, ubi nunc oppidum, quod nostris est *le Grotte a mare*, vel non admodum longe ab eo loco; aptissimum Cupræ Montanæ situm eum esse judicaverunt, ubi nunc Ripa Tranfona, & regione Cupræ Maritimæ in edito monte aliquot passuum milibus supra mare. Ad hanc conjecturam, haud sane validissimam, multum momenti attulisse arbitror crebra antiquæ civitatis vestigia, quæ prope Ripam Tranfonam conspiciuntur, quæque Cuprenses Montanos ea loca incoluisse indicare videbantur. Accedebat Cupræ appellatio, quam certi cujusdam loci in urbe Ripa Tranfona propriam fuisse accipimus ex Francisco Pamphilo. Sic enim is in suo de laudibus Piceni libro:

*Interius Trasfo posuit munimine Ripam*

*Nulli Picentum vicinior ipsa loco.*

*Hæc fuerant quondam Montana cacumina Cupræ,*

*Nomine sic dictus monstrat in urbe locus.*

Denique cum alii aliis locis aliquando Cupram Montanam figere maluerint, non modo solida argumenta proferre non potuerunt, sed ne conjecturas quidem probabiles. Quare cum & Ripæ Tranfonæ locus aptissimus videretur, & perspicua antiquitatis monumenta sane plura, atque illustria apud eam urbem in dies erui constaret, atque in ipsa urbe, si qua Pamphilo fides, Cupræ appellatio extaret; nimis pronum dictu erat, non alibi querendum esse Cupræ Montanæ locum.

## XVII.

**S**ed quamvis hæc satis probabiliter constituta videantur, nutant tamen, ac meo etiam iudicio plane corruunt. Nam primo quidem meris conjecturis hæc opinio nititur; inscriptio nulla, nullum monumentum satis certum, atque adeo ne probabile quidem ad eam adstruendam affertur. Deinde quæ ratio multos impulit, ut Cupram Montanam e regione Cupræ Maritimæ collocarent, eadem alios fortasse movere posset, ut eam urbem longius inde dimoveant. Nimis enim Ripæ Transonæ locus, vel potius is locus, quem hodiedum appellant *la cività*, ubi crebriora apparent antiquitatis vestigia, ei loco vicinus videtur, ubi Cupra Maritima fuisse existimatur; vix enim urbes istæ IV. aut V. pass. millibus inter se distassent, ut ab eorum locorum peritis audivi. In tanta autem propinquitate civitates duas satis amplas, & copiosas consistere, & agrum alendo populo idoneum habere potuisse non deerit qui ægre sibi suaderi patiatur; licet enim id exemplo non careat, rariusculum tamen est, nec ubique occurrit. Atque ego hac potissimum de causa aliquando suspicatus eram Laurentium Azolinum Ripanorum Episcopum Holstenio Cupræ Montanæ situm querenti, aliquot mil. pass. supra Ripam Transonam indicasse, maluisseque a communi hominum opinione recedere, & alibi Cupræ Montanæ locum investigare, quam ad Ripam Transonam Cupræ Maritimæ propius, imminentem, & quasi incubantem figere. Sed alia fortasse ratio Azolinum E-

piscò-

piscopum movit, nam cuniculos nescio quos & subterraneas vias videre sibi visus erat in iis locis, quæ a Cupra Maritima ad eum locum pertingerent, ubi is Cupram Montanam fuisse conjectabatur, quod & Holstenio indicavit. Sed vir doctissimus Nicolaus Recchius Ripæ Transonæ, patriæ suæ, Episcopus, & patriarum antiquitatum investigator solertissimus, nihil ejusmodi in ejus civitatis vicinia se vidisse testatur, ac decessoris sui sententiam omnino improbat. *Somnium est*, inquit, *Episcopi Azolini: nam nulli sunt in ea regione cuniculi præter arenarias Ripæ, quæ, ut Cupram Maritimam attingerent, ultra III. millia passuum producenda forent. Quid si isti cuniculi essent supra Ripam Transonam?* Hæc notavit vir doctissimus ad oram codicis Holsteniani, qui Romæ est in bibliotheca Imperiali, cui ipse decennio præfuit, ut significavit Constantinus Rogerius Vir Cl. nunc eidem bibliothecæ præfectus, qui cum hoc, tum alia multa inter legendum ad hanc meam Epistolam notavit, mihiq; ut communicarentur, humanissime permisit.

## XVIII.

**S**ed quid quod si Cupram Montanam ad Ripam Transonam constituas, nullum reperies idoneum locum, ubi probabiliter fuisse Cupram Maritimam dicere possis? Nam quod vulgo persuasum erat Cupram Maritimam ad mare sitam fuisse prope locum *le Grotte*, id qua ratione defendi possit, non video. Testis est P. Paciaudus nullum vetus monumentum umquam esse repertum, nullum antiqui ædificii vestigium

gium apparere ad eum locum *le Grotte a mare*. (a) Monumenta vero omnia, quæ extant sane plurima circa Ripam Transonam, ac præsertim in eo loco, quem dicunt *la cività*, reperta esse confirmat. Et illud nomen *la cività*, & monumenta ibidem effossa demonstrare videntur ibi Cupram Maritimam fuisse, nec Paciaudus ipse diffitetur celebre Dæ Cupræ templum ibi olim fuisse. Ex quo fit alibi omnino quærendam Cuprensium Montanorum sedem, quoniam esse ibi non potest, nisi ex duplici Cupra unicam velimus efficere.

## XIX.

**A** Ccredit Plinii, &, ut mihi videtur, etiam Prolemæi auctoritas, qui Cupram Montanam in mediterraneis Picentum sic collocant, ut facile iudicari possit molto plusquam pass. mil. V. distasse illam ab ora maritima. Plinius in hunc modum Piceni urbes describit: *Tervium, quo finitur Prætutiana regio & Picentum incipit. Cupra oppidum, Castellum Firmanorum, & super id colonia Asculum Piceni nobilissima: intus Novana: in ora Cluana, Potentia, Numana a Siculis condita. Ab iisdem colonia Ancona &c. Intus Auximates, Beregrani, Cingulani, Cuprenses cognomine montani, Falavienses, Paulsulani, Pleninenjes, Ricinenjes &c.* [b] Est, ut audio, qui Plinii locum alio modo distinguat & legat: Cu-

(a) *Dissert. de Antiquit. Rip. Tr. pag. 132.*

(b) *Plin. l. 3. c. 13.*

*Cupra oppidum, Castellum Firmanorum, & super id colonia*; [ideſt Firmanorum] *Asculum Piceni nobiliſſima*; *intus Novana, in ora Cluana &c.* quæ le-ctio magis etiam nobis eſt opportuna. Vides igitur, amiciffime Garatone, Cuprenſes Montanos intus, id eſt in intimo Piceno a Plinio collocari, & quidem ad eam partem, quæ eſt ſupra Cluanam, Potentiam, Numanam, Anconam, minime vero ad eam, quæ ſupra Cupram Maritimam, & Truentum verſus. Cum enim ex Prætutiana regione ad Picentes accedat, ab ora maritima incipit, & primo Cupram oppidum, hoc eſt Cupram Maritimam, tum caſtellum Firmanorum recenset. Inde ad mediterranea pergens Asculum coloniam nobiliſſimam nominat, & minus a mari diſtantiſſimam Novanam: at de Cupra Montana ſilet omnino. Inde ad oram maritimam reſgreſſus Cluanam indicat, Potentiam, Numanam, Anconam; rurſumque, ad ea loca, quæ huic oræ maritimæ reſpondent interius, tranſitum facit, & Auximantes, & Beregranos aſſert, & literarum ordinem ſecutus, Cingulanos & *Cuprenſes cognomine montanos &c.* Ex quo apparet Cuprenſes Montanos & longe a mari ſitos fuiſſe, & ea loca tenuiſſe, quæ ſupra Anconam, Numanam, Potentiam & Cluanam ſunt, non quæ ad Truenti oſtia, & Cupram maritimam ſpectant. Janus Plancus V. Cl. hac una Plinii auctoritate Cupræ Montanæ ſitum certo cognosci & definiri poſſe exiſtimat, eo quod Cuprenſes Montani juxta Auximantes, & Cingulanos a Plinio recenſeantur. [a] Verum

---

(a) Che la Cupra Montana foſſe poi dove è ora il Maſſaccio

rum Plinius hic, ut alibi fere, in recensendis Picenitioris civitatibus literarum ordinem sequitur, nec magis ejus valet auctoritas ad Cuprenses Montanos quasi medios inter Auximates & Cingulanos constituendos, quam juxta Falarienses, aut Ricinenses, & si qui sunt alii ex Picentibus, qui magis a Massatiensium finibus sint remoti. Id unum igitur ex Plinii auctoritate colligi potest Cuprenses Montanos quærendos non esse iis locis, ubi Cuprenses Maritimi fuerint, eosque longius abfuisse a Ripæ Transonæ loco. Ex quo fit in alia Piceni parte quærendum esse ejus civitatis situm, sed ad eum definiendum, certoque statuendum in Massatii oppidi vicinia, uti Cl. Planco videtur, nullam in Plinii auctoritate momentum est.

## X X.

**C**Um Plinio consentire videtur Ptolemæus; sic enim Picentes describit, juxta editionem Marginianam, quam unam adhuc videre licuit: *Castro. Cupra maremma. Bocca del fiume Truento. Potentia. Numa-*

---

faccio di Jesi, e dove è stata trovata questa Lapida, apparisce dalla descrizione, che fa Plinio della quinta regione d'Italia nel Lib. III. al cap. 13, dove così incomincia: *Quinta regio Piceni est*, &c. e dopo aver descritte molte Città del Piceno, e tra queste la Cupra semplicemente, che mette vicina al Castello di Fermo, ec. passa a descrivere altre Città, ed altri popoli del Piceno dicendo: *intus Auximates, Veragrates, Cingulani, Cuprenses cognomine Montani*. Dove si vede, che egli ripone i Cuprensi Montani vicino ad Osimo, e a Cingoli, come in fatti è presentemente il Massaccio. *J. Plant. ep. cit.*

*Numana. Ancona.* Hæc in maritimis locis. In mediterraneis vero: *Trajana. Urbe Saliva. (a) Septempeda. Cupra Montana. Firmio. Asculo. Adria.* Non sum nescius, non admodum accuratum esse auctorem hunc in locis præsertim mediterraneis describendis, sed tamen semper dormitasse illum non crediderim. Quod si Cupra Montana Maritimæ contermina, atque usque adeo vicina fuit, ut vulgo existimatur, cum id Ptolemæus ignorare non potuisset, non video cur alteram ab altera distinguere debuisset. Quod si quis Cupram Montanam a Maritima recte secretam a Ptolemæo contendat, quod hæc in ora maritima, illa in mediterraneis fuerit, quid est, cur Ptolemæus quoque Cupram Montanam cum ceteris Piceni urbibus, quæ ad oram Anconitanam spectant, cum Plinio collocat, tum ad Firmum, Asculum, Hadriam regreditur, quæ in ora Cupram Maritimam habent, & Truenti ostia? Quid est cur inter Firmum, & Asculum eam urbem non interfert, sed locum ei in citeriore Piceno ante Firmum assignat? Hunc ego scriptorem minus quandoque accuratum non diffiteor, ita stolidum non judico, ut omnia sus deque misceat, & pervertat. Quod si qua fides ejus Tabulis Geographicis habenda sit, hinc etiam intelligi poterit, Cupram Montanam multum a Cupræ Maritimæ finibus distasse. Etenim in Tabula VI. Europæ, ubi Italia & Picenum describitur, Cupram Montanam, in ipso Piceni meditullio sitam videre licet, quod, etsi ad verum ejus civitatis locum definiendum haud sane multum conducat, tamen aperte demonstrat Cupram Montanam a Maritima longius abuisse.

XXI.

---

(a) Hoc est Treja, Urbs Salvia.

## XXI.

Cum itaque nec ullum Cupræ Montanæ certum vestigium super sit iis locis, ubi nunc Ripa Tranfona, & Plinii etiam, ac Ptolemæi auctoritas eorum opinioni refragetur, qui eo loci Cupram Montanam figunt, quid causæ sit non video, cur Cuprenses Montanos negemus extremum hunc Agri Pice- ni limitem incoluisse, ubi Massatium est, alteri illi, ubi Cupra Maritima, & Ripa Tranfona, ex diametro oppositum. Ecquod enim illustrius ejus rei testimonium requirimus inscriptione hac nostra, aut quam rationem inibimus ad antiquarum urbium, & populorum sedes internoscendas, si hanc respuimus? Est hoc argumenti genus eruditorum omnium suffragio comprobatum, si quidem de loco, ubi primum eruta sunt ejusmodi inscriptiones antiquæ, certissime constet, nec suspicari liceat, ne sint aliundæ advectæ, uti de nostra hac certe suspicari non licet, quæ hic eruta est XXX. ab hinc annis ad Divi Eleutherii, nec desunt viri probatissimæ fidei, qui & locum designare possint, unde eruta est, & tempus meminerint, cum primo reperta, cumque ad Ferrantiorum ædes transvecta est, curante scilicet Dominico Ferrantio, qui patriæ suæ dignitati egregie consuluit, cum rarum hoc monumentum, cujus ope & Cupræ Montanæ situs, & Massatii origo aliquando detegenda erant, ab interitu, cui erat obnoxium, eripuit. (a)

XXII.

---

(a) A. D. MDCCXVIII. IV. Non. Octobris Inscriptio ista translata est ad Ædes Ferrantiorum mensibus aliquot, postquam reperta fuerat.



## XXII.

**S**ed quamvis hujus inscriptionis testimonium omni exceptione majus habendum sit, juvat tamen aliis argumentis, & quasi adminiculis ejus fidem adstruere. Nam in fundo quidem, ubi lapis iste effossus est, admodum perspicua apparent antiquitatis vestigia, quæ haud ignobile oppidum ibi olim fuisse indicant, quæque si multo ante id tempus ab sedulo aliquo istarum rerum investigatore observata fuissent, antequam magis corrumpere & perirent in dies, multo etiam illustriora Cupræ Montanæ indicia haberemus. Occupabat vetus id oppidum eam planitiem, quæ infra Massatium est Æsium versus ad Divi Eleutherii, quæ pervetusta Ædes est Divo Massatiensium tutelari sacra: Plebem S. Eleutherii vulgo appellant, ejusque curator Plebanus olim, nunc Archipresbyter dictus, intra Massatium oppidum habitat ad Divi Leonardi. Verum non eam solum planitiem occupabat vetus ea civitas, sed etiam campos adjacentes, eos maxime, qui facili declivio protenduntur in Boream. Altius enim effossa humo in extrema ejus agri parte, quæ ad Plebem Divi Eleutherii pertinet, antiquorum ædificiorum vestigia ibi quoque deprehendimus. In Æde Divi Eleutherii, propterea quod magna ex parte resecta sit, nihil est, quod magnam præferat vetustatem, si muri partem non exiguam excipias ex secto lapide operis sanequam antiquissimi. Sed tamen totus ille tractus parietinis & ruderibus ita refertus est, ut non  
modo

modo, ubicumque terram effodias ædificiorum reliquæ ingentes, & lateritii canales, & subterranea cubicula, & pavimenta mire elaborata appareant; sed aliquid etiam hujusmodi supra terram non uno in loco emineat, ex quo de amplitudine & magnificentia ædificiorum, quæ in his locis erant, facile conjecturam facere licet. Est rusticana domus in eo prædio, quod ad Divi Eleutherii spectat, ubi ejus oppidi partem nobiliorem fuisse crediderim, antiquis parietinis superstructa. Visuntur hic ingentium fornicum reliquæ, quibus domus ipsa est imposita, & quod superest, antiqui muri tanta crassitie, tantaque firmitate est, ut admirationi esse possit iis, quibus non satis perspectum est, quæ olim esset ædificandi ratio, rebus præsertim Romanorum florentibus. Hinc profluxit Arcis Acciæ commentum non illepidum; in his enim veterum murorum reliquiis, cujusdam Arcis munitissimæ, olim ab Romanis conditæ, vestigia nescio quis videri sibi visus est, idque in vulgus edidit, ac nomen etiam ejus Arcis acute excogitavit, voluitque Acciam esse dictam, unde processu temporis Massatium, sive Massaccium quasi Massa Accia emerferit. Sed mittamus nugas.

## XXIII.

**S**upra eam domum, ubi agricolæ hortulus est, ædificia fuisse pereleganter pavimentata, compertum est. Ex his alia erant exagonis laterculis constrata, quod pavimenti genus satis vulgare habitum esse crediderim in illa Romanorum lautitie, & magnificentia, alia autem ex marmoreis crustis  
per-

perpolitis, apteque figuratis, ut inter se artificiose componi possent, earumque ingens copia passim eo loco effoditur. Quamvis autem totus ille tractus continua plurium sæculorum fossione, & consitione disiectus, & dissipatus sit, alicubi tamen integra extant ejusmodi pavementorum vestigia. Particulas aliquot, ubi tantillum agri adhuc intacti reperire licuit, detegi, & mundari curavimus, secus viam, quæ est inter Divi Eleutherii, & prædium istud, de quo dicimus, suntque intra ejus ipsius prædii septum. Videre hic licet, cujusmodi essent asarota illa pavimenta antiquorum, vel marmorato oblinita, & picta, vel ex minutissimis tessellis composita, quæ musiva appellamus, de quorum origine, & usu apud Romanos plura habet Plinius (a). Utriusque generis specimen aliquod hic adhuc superest, imprimisque admiratione digna est integerrima, ac vividissima colorum species, qui in reliquiis prioris illius pavimenti ex marmorato apparent, quosque neque interfluvius humor, neque acriores succi, quibus humus, montanis præsertim locis referta est, quique vel durissima metallorum corpora labefactare solent, vel dissolvere, vel vitare ullo modo potuerunt.

## XXIV.

**P**ossem hic etiam commemorare plurimos in iis locis reperiri nummos veteres ex omni forma & metallo, & omni ætate percussos, quæ res notissima, ac vulgatissima est. His proximis mensibus sane plurimos recens effossos vidi, meras tamen quisqui-

---

(a) *Hist. N. l. 36. c. 25.*

squillas, si unum fortasse, & item alterum exceperis, non prorsum tritos, & vulgares, quos Ravennam misi ad Gabrielem Guastuccium, Monasterii Claissenis monachum, istarum elegantiarum amantissimum. In his est Divi Romuli, quem ferunt, Maxentii filii nummus integerrimus, & satis elegans ex ære, & argenteus unus sequioris ævi, cujus altera facies habet HLVDVVICVS IMP. altera vero VENECIAS. Ejusmodi nummum videre est apud Leblancum, & Muratorium, aliosque, sed Muratorius eum non Venetiis nostris, sed Venetiæ Britanniae minoris urbi adjudicandum esse pronunciat. Non desunt alia antiquitatis vestigia, & inscriptionum antiquarum fragmenta, (a) & ollæ cinerariæ, & diversi generis vasa fistilia, quæ passim deteguntur. Loculus nuper inventus est cum ossibus humani cadaveris ex tegulis prægrandibus, ut mos olim fuit, constructus, in quibus id est inscriptum: C. CAMVRI SAL. F. Aliam figlinam veterem in iisdem Cupræ Montanæ parietinis inveni, quæ nunc est apud Ferrantios, cum hac inscriptione: C. C. C. L. AVCTI., quæ ab inscriptione figlinæ superioris haud multum abludere vide-

---

(a) Tabulas duas marmoreas inscriptas sunt qui meminerint vidisse in fundo beneficiario Cbri tophori Broache, Presbyteri Massatiensis, prope Cupræ Montanæ locum, easque multorum opinio est in reparatione domus rusticæ, quæ in eo fundo est, esse absumptas. Ex variis vero veterum Inscriptionum fragmentis, quæ vidimus, nihil fere exsculpi potest, si forte nomen aliquod excipias, uti est istud marmoreum statuae virilis effo-

RVFFVS. F.
IV.

leutherii, est apud humanissimos Ferrantium, & pedem alii viderunt eodem loco repertum.

Brachium quoque sum ad Divi E-mum virum Ipsi item marmoreum

videtur. Cum enim ibi *C. Camurium* nescio quem habeamus, ex cujus nimirum officina ea figlina prodierit, non video cur hic legere non liceat *C. Camuri. C. Liberti. Aucti*: ut Auctus iste vel superioris Camurii, vel alterius ex ea gente Libertus fuerit, eidem officinæ præfectus. Gens autem Camuria cum aliis locis per Italiam, tum apud Attidiates a Cuprensibus Montanis non multum diffitos notissima erat, ut ex insigni inscriptione *C. Camurio* posita apud Muratorium, (a) & ex alterius inscriptionis fragmento apud Attidiates reperto, quod in schedis Hieronymi Comitis Vecchii Fabrianensis ejusmodi est:

Q. CAMVRIO. L. . . . .

LEM. NVM. . . . .

IVNIORI.

Habemus & Camurium XV. Leg. militem apud Tacitum (b), quem crebrior fama tradidit impresso gladio Galbæ Imperatoris jugulum hausisse. Sed quid attinet hic de gente Camuria differere? His ipsis diebus, quibus hæc scribimus, vetus sigillum, in rudibus Cupræ Montanæ repertum, perlatum est ad nos, cui id est inscriptum:

Q. FLAVI

HERMETIS

Sed & leunculus ex ære elegantissimus ibidem his diebus repertus est, & lapideum leonem grandioremem eodem item loco effossum videre licet in fastigio templi Divi Leonardi intra oppidum Massatium. Ex quo

(a) Pag. DCLXXXVI. & MXCVI.

(b) Hist. l. 1.

quo haud scio an quidquam suspicari liceat de cultu Matris Deum apud Cuprenses Montanos. Sed & laterculum quoque fictilem, arte plastica elegantissime formatum, vidimus apud Antonium Martirellium Archipresbyterum Massatiensem, cujus hic ectypom damus. Effossus est haud ita pridem prope eum locum, unde nostra inscriptio Cuprensiū Montanorum index eruta est, passibus aliquot supra domum rusticanam, de qua ante diximus. Atque hinc etiam magis, ni fallor, apparet, fuisse eum locum nostri hujusce oppidi celebriorem, illustrioremque, ubi & ædificia splendide constructa, & his etiam plasticis operibus ornata essent, & publicum illud monumentum Antonino principi poni commode potuisset.

## XXV.

**E**st præterea vetus quoddam ædificium pari fere spatio Massatium inter & Cupræ Montanæ locum, secus viam, qua Æsium itur, quod instar subterraneæ cryptæ olim erat, nunc magna ex parte supra solum eminent, decrescente scilicet in dies modico eo tumulo, sub quo ædificium istud erat effossum, & humo, qua tegebatur, ut sit in ejusmodi locis, sensim dilabente. Longum est palmos Rom. 85. 11. latum 47. 8. altum vero introrsum ad palmos 18. Totum opus ex calce & fragminibus diversæ materiæ, arenaque simul coagmentatis solidissimum est, ac fornicibus ex eodem opere firmissimis contentum. Inferius duas in partes dividitur secundum longitudinem, patetque aditus ex una in alteram per arcus sex informes, satis humiles, vix palmos 6. altos,

l  
e  
s  
o  
b  
n  
e  
s  
i  
e  
m  
f  
ec  
n  
i  
s  
uo  
us  
—  
tit.  
ye.

(c) *De Laud. Pcen.*





altos. Exteriorius rude & impositum est, utpote quod, ut dictum est, totum sub terra latebat. Interiorius tectorio opere decenter ornatum erat, ejusque non exiguae reliquiae integerrimae adhuc visuntur. Super id moles olim extabat non minima ex secto lapide quadrato, ut ex multis indiciis, meo judicio certissimis, constat. Sed ante hanc memoriam ea moles disiecta est, nec cujusmodi fuerit, conjectari licet. Ejus reliquias, lapidis secti magnam vim, in variis aedificiis & operibus vel privatis, vel publicis, absumptas fuisse probatissimorum hominum testimonio accepi. Est is locus veteri infamia notissimus: Barlotium vulgo dicunt, ac multorum opinio est ab hæreticis, quos Fraticellos (a) dicebant, extructum fuisse, ut ibi suos cœtus scelestissimos clam habere possent, unde & Barlotium nomen traxerit, ex quodam scilicet nefario ritu, quo ejus sectæ homines in suis nefariis sacris utebantur: quem ritum describit pluribus Fl. Blondus auctor Synchronus (b), Franciscus Pamphilus (c) & alii plures. Et sane cum ea pestis medio sæculo XV. late per Picenum cum edictis gravissimis, tum vi & armis compressa, & male multata fuisset, ejus reliquias ad hæc loca, atque in hunc Piceni extremum limitem confluisse manifestum est, nec a vero abhorret latibulum hoc maxime delegisse homines spurcissimos, ut suarum obscœnitatum sacrarium esset. In quo quid agerent in nocturnis illis congressibus, quibus

D

arti-

(a) Rainaldus ad ann. 1421. &c. S. Antonin. 3. p. tit. 22. &c.

(b) Blond. Ital. Illust. ex interpr. Italic. L. Fauni. p. 126. &c.

(c) De Laud. Picen.

artibus viros fœminasque sub religionis specie deciperent, quibus denique præstigiis ab se deceptos dementarent, & ad infanda sacra initiarent, nec hujus loci est dicere, & cum pudor vetat, tum res est vulgari fama, & multorum scriptis notissima (a). Sed ut facile concefferim fuisse ejus cryptæ latebras aptissimas ad tantam flagitiorum colluviem oculendam judicatas, ad idque delectas, supra fidem tamen esse videtur, ut illa fœx, & fugitivorum hominum manus tantum opus construere potuerit. Accedit quod & multo majorem antiquitatem præferre videtur, quam ut medio sæculo XV. sit conditum, & tantæ amplitudinis erat, ut & alios omnino conditores habere, & ad alios usus factum esse debuerit, quod ejus enim nunc superest, aliqua tantum pars est, ut ante diximus. Eruditissimus Raphaellius, quem ante nominavi, rogatu meo cum nuper ad hæc Cupræ Montanæ vestigia considerata venisset, longe antiquissimum esse hoc ædificium judicavit, & fortasse ad Romanorum tempora referendum. Erat una Octavius Turcius Canonicus Piranus, antiquitatum studiosissimus, cujus idem ea de re judicium fuit. Ego enim eo consilio viros eruditos accersiveram, ut in eorum auctoritate præsidium aliquod statim haberem, si quis esset qui, propter rei novitatem, non satis sibi persuadere posset hæc me Cuprensiū Montanorum indicia in his locis reperisse. Audiveram enim esse qui nescio quid mussitarent, dicerentque permirum sibi videri in ea inscriptione, quæ apud Ferrantios est, *Cuprenses Montanos*

---

(a) *Blond. loc. cit. &c.*

anos legisse me, cum tale aliquid nec Cl. Abbas Petrus Cannetus ex ordine meo vir eruditissimus, qui eam exscripsisse dicitur, nec Angelus Tacchius, presbyter Massatiensis, cujus recens est, nec tenais, fama hic in patria sua, nec alius ante me quisquam vidisset. Sed quis tandem ejus ædificii, quod supra descripsimus, primitivus usus fuerit, divinare non licet. Nisi tantæ amplitudinis esset, ad alicujus familiæ sepulcrum conditum fuisse, aliquis non inepte suspicari posset; neque enim inauditum est ejusmodi sepulcra concamerata, & etiam admodum ampla, olim in usu fuisse. Sed hic noster specus non unius modo familiæ, sed totius populi Cuprensis Montani cineres capere potuisset.

## XXVI.

**S**Ed nullum, meo quidem judicio, his locis habemus illustrius antiqui oppidi indicium, quam aquæductum in topho excavatum, qui paucis ab hinc annis casu detectus est, quique aquam ab eo fonte duxisse videbatur, qui subtus Portam suburbii Massatiensis, qua Æsium itur, manabat, quemque aggesta paulatim humo per incuriam corruptum pene jam intercidiſſe vidimus. Altus est ductus iste palm. Rom. 5. 10., latus palm. 2. 9. quamquam non eadem ubique altitudo est, sed alicubi aliquanto minor. Cum primum subterraneus iste ductus detectus est, varia hominum judicia fuere, sed qui melius aliquid in ea re vidisse existimati sunt, cæcum iter, & occultam viam esse dixerunt, qua ab Arce Accia, quam in antiquis hujus nostri, oppidi ruderebus so-

mniano viderant, ad Massatium oppidum clanculum iri posset. Sed pudet hæc somnia regere. Plumbei tubi prægrandes aliquot ab hinc annis effossi sunt secus eum locum, ubi hujus cuniculi exitus, quantum conjectura colligere possumus, esse debebat. Ibi etiam coctiles tubi hodie dum effodiuntur, vel eorum certe creberrima fragmenta passim occurrunt, & subterranea quoque aquarum conceptacula eo loci fuisse facile conjici potest ex eo, quod narrant, se ejus loci agricolæ deprehendisse, cum terram lucrispe allesti altius effoderent, quod sæpe eos factitasse cognovimus. Hæc ego cum mecum animo versarem, locique situm considerarem, haud ægre mihi suadebam, non aliunde quam per cuniculum illum, quem ante descripsimus, aquam in ea loca influere potuisse. Sed liquido tandem non alium, quam aquæ ducendæ ejus cuniculi usum fuisse perspexi ex ea crusta, quæ ex diuturno aquæ decursu ad ejus fundum, ac latera concrevit, quæ quidem crusta ad fundum aquæductus semidigitali crassitie est, ad latera autem multo minori.

## XXVII.

**H**æc indicia, & vestigia antiquissimi oppidi, & quidem satis ampli, & lauti in his locis habemus, non fucata illa & ficta, sed solida, atque expressa, & ni mea me fallit opinio, clarissimis inusta notis veritatis. Ecquod autem oppidum istud fuerit, nemo ante hoc tempus, ne conjectando quidem, pervidere tentavit, si Arcis Acciæ somniatores  
exce-

exceperis. Sed Cupram Montanam fuisse, nunc tandem Inscriptionis nostræ beneficio compertum est, & montana hæc regio mirum in modum congruit, præsertim cum nemo hætenus, nisi ineptissime, ejus civitatis situm alibi quæsierit. Accedit, quod Cupræ appellatio, etsi penitus ætate nostra his locis extincta sit, aliquod tamen ejus vestigium superest in *Podii Cupi* nomine, qui locus hinc distat ad passus mille quingentos. Quod enim nunc *Castrum Podii Cupi*, olim *Podii Cupræ* dicebatur, ut constat ex Diplomate Innocentii III. Dat. Laterani ann. 1199. quo jura nostræ olim Camaldulensis Abbatix S. Elenæ ad flumen Æsim confirmantur, ubi præ ceteris recensentur, *possessiones, quas habetis in castro Podii Cupræ, cum hominibus quos ibi habetis*. Hujus Diplomatis autographum extat Romæ in nostro Camaldulensi Archivo ad Divi Romualdi (a), unde aliquot ab hinc annis exscriptum est ab Anselmo Costadono ex Ordine nostro viro erudito, qui aliquot ejus particulas, atque hanc imprimis, quam hic proferimus, casu, & quasi aliud agens ad me misit, nunc tandem magno mihi usui futuras. Ego integrum vulgabo in dissertatione *de Æsi flumine, & locis adiacentibus*, quam edere cogito. Porro *Castrum Podii Cupræ* in eo diplomate memoratum idem est, quod nunc *Podii Cupi* appellamus, Abbatix S. Elenæ conterminum, & solo Asinantis fluvio divisum, ubi nostri Camaldulenses, & ea imprimis Abbatia ampla obtinent latifundia. Primarium quoque ejus castri Sacerdotium monachum Camaldolensem

---

(a) Vol. XV. num. 7.

ab antiquissimis temporibus curatorem habuit, usque ad Innocentii X. tempora, cujus lege cautum est, ne Regularibus extranea hujusmodi Sacerdotia habere imposterum liceret. Sed jus tamen instituendi Sacerdotis in eo Castro ad nostrum Ordinem pertinet. Ne quis autem dubitet ex *Podii Cupræ* nomine corrupto emeruisse novitiam Podii Cupi appellationem, animadvertere juvabit vetus nomen Podii Cupræ, quod sedente Innocentio III. obtinebat, paulo post illud tempus in *Podium Cupri* defluxisse, unde *Podium Cupi*, vulgo *Poggio Cupo*, tandem fictum est. Evincitur id ex pervetustis tabulis agrariis Æsinæ civitatis vulgo *il Catasto Vecchio*, ante annos, ut minimum quadringentos scriptis in codice membranceo, quem vidimus in Tabulario publico Æsinorum. In extremo enim ejus codicis folio sic nuper legi: *De Casiro Massatii Margarita uxor olim de Racimbeni habet terram in curia Podii Cupri, in fundo terræ Metii, juxta viam cannas centum quinquaginta octo*. Sed enimvero illud quoque prætereundum non est quam inepte, atque adeo absurde, is locus nunc *Podii Cupi* nomine dicatur. Qui enim *Podium Cupum*, *Poggio Cupo*, dicit, is perinde est ac si collem imum, aut montem profundum nostra lingua dicat; id enim *Podium Cupum* apud nos sonat: quæ duo ita inter se pugnant, nihil ut magis. Neque vero in nomine solum, sed magna in re ipsa absurditas est; neque enim imus, ac depressus est is locus, ubi Podii Cupi Castrum est situm, sed præaltus, atque editissimus; assurgit enim ad mille passus; & eo amplius, supra flumen Æsim, & Asinantem, quo fit ut ex utraque ea parte perdifficilem habeat ascensum. Nequit igitur id  
pro-

proprium ac nativum ejus loci nomen esse, sed ex Podii Cupræ nomine corrupto a nostratibus conflatum sit oportet. Cujus rei conjecturam quoque ex eo capere licet, quod Oppidulum hoc, vulgo nunc *Podium Capum* appellatum, *Podium Cupi* olim dicebatur, ut ex tabulis hujus publici Archivii Massatientium innumeris ante annos ducentos, ac trecentos scriptis, compertum est. Ejusmodi autem appellatio multo affinior est ei, quam exeunte sæculo XII. habebat, cum Castrum Podii Cupræ, ac multo magis cum *Podii Cupri Castrum* dicebatur.

## XXVIII.

**A**C de situ quidem Cupræ Montanæ hætenus. Sed tu tamen cave aliud quidpiam ea de civitate a me requiras, cujus pene memoriam omnem delevit antiquitas. Quod si te conjecturæ fortasse delectant, superioribus conjecturis alias addere jüvabit. Ac de nomine quidem Cupræ Montanæ vix dubito, quin ex Dea Cupra sumptum sit, quemadmodum & Cupram Maritimam consentiunt omnes ex eadem Dea Cupra nomen traxisse. Erat ejus templum celeberrimum: ultra Firmanorum fines prope oram maritimam a Strabone memoratum, a Silio Italico, aliisque, quod Hadrianus vetustate corruptum restituit, ut ex inscriptione apud Gruterum, & apud nuperrimum Paciaudum in laudata dissertatione de antiquitatibus Ripæ Transonæ (a). *Dein Cupræ est Fanum*, inquit Strabo, oram maritimam

Piceni describens, *conditum, dedicatumque ab Etruscis, qui Junonem vocant Cupram* (a), ni mavis Cypram, quod perinde est. Silius autem ex editione P. Marfi (b).

*Hic & quos pascunt scopulosæ rura Numanæ,  
Et quis littoreæ fumant altaria Cupræ,  
Quique Truentinas servant cum flumine turres  
Cernere erat, &c.*

Cellarius (c), Gorius (d), aliique bene multi uti nomen ab Dea Cupra, ita ab Etruscis Deæ Cupræ cultoribus eam civitatem traxisse originem existimant. Cumque persuasum esset Cupram Maritimam Montanæ conterminam fuisse, eandem in utroque & nominis & originis rationem fuisse judicarunt, quod æque verum esse poterat, etiamsi locis inter se duæ istæ civitates plurimum distarent. Hic tamen moneo non videri extra dubitationem omnem id, quod de Dea Cupra dicunt. Dea enim Cupra, quæ Etruscis Juno, Sabinis Bona Dea esse poterat, qui bonum *cyprum*, sive *cuprum* dicunt, pro usu promiscuo literarum y, & u, quemadmodum ex Varrone observat Reinesius, nam *cyprum Sabine bonum*, inquit Varro (e). Quod si Picentes a Sabinis orti sunt, ut est apud Plinium [f], & apud M. Porcium Catonem (g) supra fidem non esset ab iisdem & Deæ Cupræ religionem in Picenum esse profectam, & Cupræ

---

(a) *Geogr. l. V.*

(b) *Lib. VIII.*

(c) *Geog. ant. l. 2. c. 11.*

(d) *Mus. Etrusc. Tom. 1. p. 64.*

(e) *L. 4. Vid. Reines. in 125. h.*

(f) *L. 3. c. 13.*

(g) *De origine,*



præ utriusque civitatis originem esse repetendam.

## XXIX.

**D**E amplitudine ac dignitate Cupræ Montanæ nihil pariter habemus, nisi conjecturas paucas, easdemque non admodum solidas, sed ejusmodi tamen, ut prætereundæ non sint. Plinius Cuprenses Montanos cum ceteris Piceni civitatibus per eos dies florentissimis sine ullo discrimine recenset; at Ptolemæus cum in paucis hujus clarissimæ Provinciæ civitatibus, quas, ceteris omnino prætermittis, describit, Cupram Montanam numerat; eam meo quidem judicio ex illustrioribus Piceni civitatibus fuisse demonstrat; neque enim credibile est voluisse illum celebratissimas urbes, locaque clarissima omittere, ut tenuiora describeret. Ex eo etiam quod apud Cuprenses Montanos beneficio Romanorum Principum Pueris & Puellis alimenta ex publico decreta fuerint, quemadmodum ex nostra Inscriptione compertum est, aliquis fortasse conjiciet ejus civitatis dignitatem, quæ ejusmodi fuerit, ut in ejus commodis & ornamentis augendis publicas opes rectissime impendi Optimi Principes existimaverint.

## XXX.

**Q**uærit eruditus P. Paciaudus in sua Dissertatione de Cupræ, seu Ripæ Transonæ Antiquitatibus, sitne Cupra Coloniis Romanorum adnumeranda (a), aitque ita sibi videri propter Frontini

---

(a) §. II. pag. 91,

tini auctoritatem: *Ager Cuprensis*, inquit Frontinus, *Truentinus, Castranus, Alaternensis lege Augustea assignati*. Ac paulo post: *Cuprensis ager ea lege assignatus, qua & ager Castranus*. His verbis Colonia-  
rum deductionem designari facile concedimus viro doctissimo; sed agrum Cuprensem a Frontino memoratum fuisse constat Truentino, & Castrano vicinum, eum scilicet qui Cupræ Maritimæ adiaceret, & esset ab Agro Cuprensi Montano omnino diversus. Quare ut de Cupra Maritima non negamus ex Coloniais Romanorum esse habendam, propter Frontini testimonium, ita de Cupra Montana dicere non audemus. Sed Paciaudus cum Montanam Cupram apud Ripam Transonam non recte constituit, tum non satis duplicem Cupram, Montanam a Maritima, distinguit. Interim hic abs re fortasse non erit animadvertere a Frontino agrum Cupræ Maritimæ adjacentem Cuprensem omnino dici absque ulla nota, quod non temere, sed certa ratione factum oportuit. Sic enim existimo & populum, & agrum Cupræ Maritimæ nulla apposita nota Cuprensem, dici consuevisse; quoties autem Cupræ Montanæ, aut populum, aut agrum nominare oportuisset, *Montani* appellationem adjungi debuisse. Franciscus M. Raphaellius, quem hic iterum honoris causa nomino, alia ratione probare se posse putat Cupram Montanam in Colonia-  
rum numero esse habendam, non secus ac ceteras Piceni civitates, nimirum ex lege *Flaminia de agro Piceno, & Gallico viritim dividendo*. Quæ vis hujus argumenti sit, explicabit ipse in iis libris, quos de antiquis Picentibus edere parat in lucem.

## XXXI.

**E**st vetus inscriptio apud Atinates olim reperi-  
ta, & nunc Turri horariæ ad Divæ Mariæ  
infixa, quam non semel ediderunt viri docti Go-  
rius, Muratorius, Marangonius, Bonaventura Theo-  
lus, P. Paciaudus, & Cl. Academicus Cortonensis  
supra laudatus, sed tanta lectionum varietate, ut  
merito suspicari aliquis possit non esse unam ean-  
demque Inscriptionem. Gorii exemplum, a quo vul-  
gata est inter Donianas, ex collectaneis Dominici  
Panicalis ita se habet:

M. RVBRENO. VIRIO. PRISCO. POMPONIANO  
PROCVLO. MAECIANO. COS. CVPR. COO. CVR  
COL. MINTVRNENSIVM. APRIC. CVR. COL. FOR  
MIANORVM. PRAET. CANDIDATO. QVAEST.

CANDIDATO. X. VIRO. SALIO. COLLINO. CIVI  
ET. PATRONO. ORDO. ET PLEPS. ATINA  
PVBLICE.

In latere ejusdem lapidis hæc leguntur:

IVNIAE. ARRIAE. RVFINAE. C. F  
VIII. COS. FIL. EIVS.

Laudatus Academiæ Cortonensis socius, quem esse  
constat Rodulphinum Venutum V. Cl., qui sub no-  
mine Tarquinii Coritani dissertationem edidit *de*  
*quibusdam antiquitatibus ad Ripam Transonam re-*  
*pertis*, & eruditus P. Paciaudus non eodem pror-  
sus modo eandem inscriptionem legunt. Ut enim  
omittam alicubi SALLO, pro SALIO legi, PLEBS,  
pro PLEPS, PVBLICE, pro PVBLICE, & si  
qua sunt præterea de genere hoc, quæ typhotheta-  
rum indiligentiæ tribui possunt, qui Gorio est *Ru-*

*bra*

*brenus*, & *Maecianus*, apud Academicum Cortonen-  
sem est *Rubenus*, & *Marcianus*. Marangonius vero  
nec *Marcianum*, nec *Maecianum*, habet sed *Maja-*  
*num*. Is etiam pro COS. CVPR. COO., quod ha-  
bent & Gorius & Paciaudus, & Academicus Corto-  
nenfis, legit COS. CVPREO. Muratorius eandem  
inscriptionem bis dedit, primo quidem pag. CCCLX.  
num. 2., tum quasi a priore diversam pag. MCX,  
ac primo quidem ex suis schedis, tum ex Donio.  
Sed magnopere dissonum est utrumque Muratorii  
exemplum a superioribus. Nam qui aliis est *Virius*  
*Marcianus*, vel *Maecianus*, vel *Majanus*, Muratorio  
dicitur *Verius Majanus*. Mitto cetera, ac tantum  
animadverto nihil de *Consulatu Cuprensi*, vel *Cupreo*,  
cujus aliquod indicium est in exemplis hujus inscrip-  
tionis a Gorio, Paciaudo, Venuto, & Marangonio  
editis, apud Muratorium extare in primo hujus  
inscriptionis exemplo, quod affert ad pag. CCCLX.  
n. 2. Versu enim tertio pro COS. CVPR. COO.  
legit Muratorius COS. PR. PR. In tanta lectio-  
num varietate difficile est aliquid certi proferre.  
Paciaudus, & eruditus ille Academicus Cortonen-  
fis M. hunc *Rubrenum*, ni mavis, *Rubenum*, vel *Ru-*  
*benium*, nam *Rubenium* quoque alicubi legimus,  
Cupræ Montanæ Consulem fuisse existimant, unde  
& ejus civitatis amplitudinem, & dignitatem conji-  
ciunt. Est enim ejus civitatis, quæ cum esset Ro-  
manis subjecta, suos tamen habuerit Duumviros cum  
præclaro hoc Consulum nomine, singulare quoddam  
ornamentum & decus, ut propterea clarissimus No-  
risius eximie raritatis inscriptionem quandam esse  
judicaverit, in qua aliquid de Consulibus Pisanis oc-

curre-

currebat. Gorius vero non apertissime quidem fate-  
tur designari hic Consulem Cuprensem Montanum,  
sed in eam tamen opinionem pronus est. *Cupræ*, in-  
quit, *fit mentio in hoc lapide, ac fortassis Montanæ.*  
*Quum enim in vetustis lapidibus Maritima nomina-*  
*tur, ad discrimen notandum, additur CVPRA.*  
MAR. Magnum erit momentum in hac viri Cla-  
rissimi ratione, si plures reperiantur antiquæ inscri-  
ptiones ad Cupram Maritimam pertinentes, in qui-  
bus sit CVPRA. MAR. Ego unam vidi apud lau-  
datum Paciaudum a Grutero acceptam, ac nullam  
præterea vel Paciaudus ipse affert in suis Cupræ,  
seu Ripæ Transonæ monumentis, quibus colligen-  
dis, & illustrandis non indiligentem navavit ope-  
ram. Eandem vidi apud laudatum Academicum  
Cortonensem. Sed nostra quoque Massatiensis in-  
scriptio eruditissimi Gorii conjecturam infirmat :  
Pueri enim & Puellæ Alimentarii, in nostra hac  
inscriptione memorati, non Cuprenses modo, sed  
Cuprenses Montani dicuntur. Quod si conjecturis  
indulgere liceat, Cupram Maritimam potius credi-  
derim scribi, & nominari Cupram ut plurimum con-  
suevisse absque alia nota, & discrimine, ut supra  
etiam monuimus, cum de agro Cuprensi, qui a Fron-  
tino memoratur, sermo incidisset. Quod si ex me  
quæras, humanissime Garatone, quod meum judi-  
cium sit de hoc Cuprensi Consule, vero propius  
videri mihi dixerim, eum, si unquam fuit, Cupræ  
Maritimæ adjudicandum esse, idque duabus potissi-  
mum de causis. Primum enim Cupram Maritimam  
longe nobilissimam, & amplissimam civitatem præ  
Cupra Montana fuisse existimo; idque ex Templo  
Deæ

Deæ Cupræ apud antiquos celeberrimo, & ex creberrimis splendidæ antiquitatis monumentis conjicere licet, quæ passim observantur, & effodiuntur in diès ad Ripam Transonam, hoc est in iis locis, ubi Cupram Maritimam fuisse compertum est: ex quibus partem non minimam videre licet apud P. Paciaudum, & quem non semel nominavimus Academicum Cortonensem. Accedit quod Consul iste Cuprensis, cum ex Atina civitate esset, Minturnensium, & Formianorum Curator, commodius apud Cuprenses Maritimos, quam apud Montanos Consul cooptari potuit, ob earum civitatum immodicam a Cuprensisbus Montanis, multo vero minorem a Cuprensisbus Maritimis distantiam.

## XXXII.

**Q**ui fuerint agri Cuprensis Montani fines difficile dictu est, si eam partem excipias, quæ Æsi flumine alluitur. Cum enim eo flumine ager Picenus olim ab Umbria, tum ab agro Gallico divideretur, ager Cuprensis Montanus ultra eum terminum excurrere non poterat. Est fluvius alius perexiguus, rivum potius dixeris, ex Apennino non longo admodum cursu in Æsim influens, paulo supra Castrum Podii Cupræ, quem Asinantem dicunt. Is nunc agrum Massatiensem a Fabrianensi dividit, sed eum tamen non existimo Agri Cuprensis Montani terminum fuisse, cum vix passus mille supra Massatium, adeoque supra Cupram Montanam defluat, nec verosimile sit civitatis, satis amplæ & illustis, fines non multo latius patuisse. Magnam itaque ejus montis partem, quæ Æsi & Asi-

Afinante clauditur, & ad Apennini radices propius accedit, ubi Rotorfium (a), olim Scaligeræ, nunc Stellutiæ gentis, apud Fabrianenses clarissimæ, Castellum est, & Procicchiarum (b) etiam, & Domi (c) Fabrianensium seu Castella, seu vici, olim Cuprensiū Montanorum fuisse crediderim: quorum fines iidem, ac Piceni ex ea parte fuerint: siquidem Plinianæ descriptioni standum sit (d). Ut enim Æsi flumine ad Occidentem, sic Apennini jugis ad meridiem terminatum fuisse agrum Picenum Plinius indicare videtur: atque is fortasse erat Piceni terminus ex ea parte, cum Plinius scribebat, quem non ignoro aliis temporibus mutari potuisse. Tuficanos certe, quorum ager magna ex parte nunc ad Fabrianenses pertinet, quique proxime occurrebant supra Cuprenses Montanos, Picentibus non adjungit Plinius, sed in Umbros rejicit.

## XXXIII.

I Taque Æsi flumine, tum Apennini jugis continebatur Ager Cuprensis Montanus; & ab Æsi flumine primo Tuficanos conterminos habuisse videtur, tum Mathilicates, ni mavis Septempedanos, vel potius utrosque, deinde Cingulanos, denique Auximates, & Anconitanos, nisi qua civitas Auximates inter & Cingulanos, rursumque inter Anconitanos & Cu-

(a) *Rotorfo*.(b) *Le Procicchie*.(c) *Duomo*.(d) *Hist. Nat. Lib. 3. loc. cit.*

Cuprenses Montanos fuisse dicenda sit. Tantum enim agri Cupram inter Montanam, & Anconam, itemque Cingulum inter & Auximum jacet, ut unam, & fortasse alteram civitatem percommode capere potuisset. Id autem eo verosimilius mihi videtur quod, cum Æsi flumine ager Picenus a Gallico divideretur, ut Cuprensiū nostrorum fines ultra Æsim non porrigebantur, ita nec Æsinorum citra id flumen prolatos esse crediderim. Quare totus iste tractus agri Piceni, qui Æsi flumine alluitur, cujusque partem majorem Æsini nunc obtinent, aliis olim civitatibus attributum fuisse necesse est. Itaque montuosa hæc regio peramœna, quæ circa Maifatium jacet, Cuprenses Montanos habitatores olim habuit, in qua vici & oppidula plura, ut nullibi fortasse frequentiora, videre licet. In quibus etsi pauca occurrant antiquitatis vestigia, credibile tamen est ea quoque priscis Cuprensisbus originem debere. In his sunt ad Æsim Castrum Podii Cupræ, & Siscianum (a), olim, ut fama est, Æsianum dictum, nunc exiguus vicus, & aliquanto illustrius Majolati Castrum (b), & Montis Roberti (c), & Castrum Ghibellinum [d], quæ totidem monticulis insident secus flumen Æsim, ac aliquanto minus quam passibus mille inter se distant. Succedit Rubbelliani locus [e], tum Divi Pauli vicus [f], ac  
Sta-

- 
- (a) *Sisciano.*  
 (b) *Majolati.*  
 (c) *Monteruberto.*  
 (d) *Castelbellino.*  
 (e) *Rovegliano.*  
 (f) *S. Paolo.*



Staphylos etiam, tum Piranos, qui ad Apenninum magis accedunt, ad Cuprenses nostros spectasse pronum dictu est; Staphylum [a] enim & Pirum [b] oppida tribus ad summum quatuor passuum millibus Massatio absunt. Succedit tractus ille montanus, paulo asperior supra Asinantem ubi Rotorium est, & quos diximus Fabrianensium vici Domum, & Prociçhiæ. Atque hæc loca cum ad Cuprenses Montanos pertinuisse dicimus, non usque adeo deliramus, ut certo ejus civitatis fines atsecutos nos esse credamus, sed cum ex his locis nullus sit qui Massatio plus fere quam quatuor passuum millibus absit, nemini videri potest immodica hæc Agri Cuprensis Montani comprehensio.

## XXXIV.

Quod ante suspicatus eram civitatem aliquam olim fuisse Cingulanos inter & Auximates, mihi verosimilius fit, ex eo quod ad Divi Victoris in Arcione, qui locus est in Cingulanorum finibus Auximum versus, clara quædam antiqui oppidi indicia ad Musionem amnem mihi deprehendisse visus sum. Eo cum venissemus ego, & humanissimus Raphaellius, præter alia sane conspicua veterum ædificiorum vestigia, duas inscriptiones antiquas observavimus, alteram in ipsa fronte templi Divi Victoris, quæ Abbatia est Eminentissimo Cardinali Gentilio commendata, alteram vero aliquan-

E

to

(a) *Lo Staffolo.*(b) *L' Apero.*

to ultra eum locum in fundo Tavignano. Primam a nemine observatam reor : alteram ab aliis non uno modo exscriptam esse constabat. Utramque adhuc, ut opinor, ineditam, hic proferre juvat amicissimo Raphaellio permittente, quo cum in animo est primo quoque tempore eodem accedere, & diligentius ejus loci antiquitates scrutari, & describere :

INNOCENTII


QVI VIXIT

MX DXXIII

PTB 3 IND 3 III.

Habes inscriptionem christianam, quæ est ad Divi Victoris. Habeto nunc alteram, quæ est in fundo Tavignano

Ver-



Versu 1. quinta & sexta litera non parum extritæ sunt. Qui ante nos hanc inscriptionem legerunt, ut ex variis exemplis quæ apud Illustrissimum Compagnonum vidi, COLLICIO, vel COLLECIO DEO maluerunt, quam COLLEGIO DEOR. uti mihi videtur legendum, eo quod post extremam literam O satis amplum spatium in marmore erat, antequam esset corruptum, ad unam præterea literam capiendam, scilicet R.. Si quid aliunde subodorari licuisset de *Deo* quoque *Collicio*, vel *Collecio*, ea lectio sollicitanda non fuerat. Sed quis iste Deus ante hanc diem non auditus? Nam Deus aliquis antiquorum Picentum? Ut de aliis populis, bene multis, manifestum est, sic & Picentibus peculiare aliquod, & quasi gentilitium & patrium numen esse poterat. Est apud eundem Auximanorum Antistitem simulacrum Dæe cuiuspiam, & caput item alterius statuæ Deam eandem exhibentis ex marmore, quæ reperta sunt in fundo Auximanæ Ecclesiæ Montetortio, ubi & alia sunt antiquitatis vestigia. Quam Deam ea simulacra exhibeant nec ipse eruditissimus Antistes definire audeat, nec quispiam fortasse facile definiet; nihil enim commune habere videntur cum usitatis Deorum imaginibus, quæ passim observantur, nisi quid fortasse in cultu capitis sit, quale in quibusdam Ægyptiacis signis occurrere solet. Simili forma imaginem, cum eodem ornatu capitis, observavi nuper in manubrio antiqui vasis ænei, quod est Auximi in Museo Leopardo, nec dubito quin iisdem locis repertum sit. Porro Tavignani locus vix passibus bis mille a Montetortio abest, ut si quis *Col-*

*licium,*  
*q. abesse multis passibus, ut*  
*sero nuper intell.*

E 2

*licium,*

*licium*, vel *Collecium Deum* in allata inscriptione tueri velit, habeat fortasse aliquid in antiquis illis imaginibus, quod in rem suam facere possit. Ego dum quid certius asseratur legere malim COLLEGIO DEORUM, sextam enim literam primi versus, licet admodum extritam, potius G, quam C esse dixerim. Tertio autem versu legerim P. TVSIDIVS., est enim gens Tufidia in Picentibus nota ex antiquis inscriptionibus (a). Sed hæc fortasse alias diligentius expendenda erunt.

## XXXV.

**E**St locus in Massatiensium finibus, ad Divæ Luciae appellant, ubi pervetus castrum fuisse & consentiens hominum fama, & conspicua castrensium murorum vestigia declarant. Accola dictum est id castrum, nomenque adhuc loco hæret, qui nunc est in Massatiensium finibus. Olim suos habuit Dominos *de Accola*, vel *Accolæ Comites* dictos, qui una & Fellonicam obtinebant, vicum nunc plane dirutum, & Accolæ vicinum Æsium versus. Ad annum 1251. *Corradutius fil. D. Rogerii Thomæ Arlochi*, Accolæ & Fellonicæ Dominus societatem cum Æsinis iniit conditionibus multis ultro citroque, eaque imprimis, ut Corradutius in civitate Æsio domum haberet, ubi tres saltem menses in anno tegeret (b). Fuit is ultimus Accolæ Dominus, ejusque testamentum in Archivo secreto-

---

(a) *Grut.* 13. 686.

(b) *Ex. tab. Archiv. Æsin. lib. J. pag. 126. v. 11. n. 1.*

tiore Æsinorum vidimus confectum anno 1275. Corradutio e vivis abeunte, Accolæ & Fellonicæ incolæ, cum libertatem, quam erant adepti, tueri posse diffiderent, propter vicinorum potentiam, Staphylanis sese dedidere ad ann. 1286. (a) Sed tamen initio sæculi XV. Simonettus, & Brunorius ex gente Simonetta, quæ gens late his locis per eos dies dominabatur, civitatem Æsinam cum Arce Accolæ obtinebant, Vicarii S. Sedis pro more temporum appellati (b). Verum Simonettis anno 1408. in ordinem redactis (c), Accolæ arx ad Staphylanos rediit, qui in ea præfectum cum modica militum manu præsidii loco habere consueverunt ad annum usque 1447., quo anno a Piceni legato Dominico Card. Firmano iis permissum est ut Accolæ arcem & sibi inutilem, & vicinis locis propter militum latrocinia, qui in ea essent præsidii causa, maxime perniciosam, subruere, & funditus delere liceret (d). Arce Accola sublata egerunt Staphylani apud R. Pontificem, ut Accolæ solum, & agrum adiacentem emere sibi liceret. Egerunt & Æsini majore studio, atque ab his negotium confectum est, pactis a communitate Æsina nummis aureis Venetis bis mille quadringentis pro Accolæ area, & agro adjacenti, aliisque nonnullorum proscriptorum bonis in agro Æsino, quæ jam publicata fuerant. Hoc pacto Accolæ fundus ad Æsinos accessit ad annum 1452., ut ex monumentis a viro erudito

E 3

Lu-

(a) *Vid. Append. n. I.*(b) *Ex tab. in Arch. secr. Æsin. ad ann. 1404. confectis.*(c) *Baldassin. Hist. Æsin. ad eum ann.*(d) *Vid. Append. num. II.*

Ludovico Antonio Franciolino Jcto, & patritio Æsino in magna causa Æsina Collegiarum productis, & illustratis. Tandem Accolæ locus, qui communi nomine ab Æsinis coemptus fuerat, a Massatiensibus privatim emptus est ad an. 1521. 1529. ec. [a] Piri quoque oppidum, quod nunc est, quamquam perantiquum est, ex antiquioris tamen seu vici, seu castri aut oppidi reliquiis emeruisse opinatur, vir eruditus Octavius Turcius, Canonicus Piranus, qui antiqui ejus loci vestigia deprehendisse se affirmat aliquanto supra eum locum, ubi nunc Piri oppidum est. Ab eo Historiam Piranam expectamus. Ad Divi quoque Pauli vicum antiquorum ædificiorum vestigia non rara identidem deteguntur, uti & in Majolati vicinia. Apud Montem Robertum in pariete majoris Ecclesiæ lapis est L. Plotio Crucis ex tribu Velina positus ejusmodi:

L. PLOTIVS

L. F. VEL..

CRVSTA.

### XXXVI.

**S**ed nullibi clariora apparent antiquitatis indicia, quam apud Rubelliani [b] locum, cujus vel nomen ipsum nescio quid eximie antiquitatis sonat; videtur enim ex Rubellia gente ductum, uti Pompejanum, Lucullanum, & cetera hujusmodi nomina ex gentiliis familiarum nominibus confecta, ac villis, & fun-

---

(a) Ex Tab. Archiv. Massat.

(b) Rovigliano.

fundis earum familiarum imposita. Est ibi suburb-  
 num non inamœnum gentis Corradæ, quæ ex pri-  
 mis est apud Massatienses antiquis parietinis super-  
 structum, ac totus ille fundus veterum ædificiorum  
 reliquiis refertus est. Rubelliani locum Monasterio  
 S. Eutitii in *Campoli* donatum fuisse ab Ageltrude  
 Augusta ad annum 907. legimus in antiquis tabulis  
 a Baldassino primum in Historia Æsina, tum a Cl.  
 Muratorio relatis [a]. *Oratorii* Divi Petri, quod in  
 iis tabulis memoratur, omnis memoria excidit, sed col-  
 lis est Rubelliano proximus, cui ex Divo Petro nomen  
 hæsit, ibique ædiculam illam fuisse oportet. Est etiam  
 prope Rubellianum prædives Abbatia S. Apollinaris,  
 quam Priores Ecclesiæ Æsinæ obtinent beneficio Pau-  
 li III. Rom. Pontificis [b]. Ac Monasterium qui-  
 dem magna ex parte disiectum est, sed templum in-  
 tegerrimum superest, ac religiosissime curatur ab  
 amplissimo viro Scipione Guilielmio Priore Eccle-  
 siæ Æsinæ, qui nihil non egit, ut aliquid de ejus  
 Monasterii origine, ceterisque ad ejus historiam per-  
 tinentibus cognoscere posset. Quid consecutus sit ex-  
 plicabimus alias in dissertatione, quam, ut ante di-  
 ximus, de *Æsi fluvio & locis adiacentibus* in lucem  
 edere meditamur; erit enim is aptior de his agen-  
 di locus. Sed ad Cuprenses Montanos redeamus.

## XXXVII.

Quod civitatibus multis, quæ sub Romanis ma-  
 xime floruerant, propter barbarorum incurfio-  
 nes

E 4

(a) *Antiquit. med. æv. T. 5. p. 511.*(b) *Apud Ughe. in Ep. Æsin.*

nes accidisse compertum est, idem & Cupræ Montanæ accidit, quæ ita desolata est, ut ne de ejus quidem loco ante hoc tempus constiterit. Eo factum est ut majorem ejus agri partem, qui Cuprenium Montanorum fuerat, vicinæ civitates occupaverint, quæ vel deletæ non fuerunt, vel paulo post restituta. Ad Annum CMVII. Rubelliani locus, qui profecto Cuprenium Montanorum fuerat, ad Ælinos spectabat, ut ex tabulis supra laudatis [a]. Ceterum extremas ejus civitatis reliquias in hunc locum confluisse, atque hoc Massatiense Castrum condidisse si quis negarit, is oportet uno tempore civitatem non exiguam ita sublatam esse fateatur, ut quidquid erat ejus populi simul extinctum, ac deletum sit, quod esse nullo modo potest. Abstineam ab exemplis remotarum: de vicinis dicam. Ex Ostræ reliquiis consentiens fama est Montis Boddii oppidum emeruisse, non secus ac ex Ricinæ maceriis Maceratam Piceni factam, uti nomen ipsum sonat. Ita ex Sentino Saxoferratum, ex Septempeda, quod nunc est S. Severini oppidum, ex Treja Monteculum natum esse constat: & ea quidem ratione, ut earum civitatum vel ab hostibus dirutarum, vel naturali quasi fato senescentium, & ad interitum properantium habitatores, altiora loca, quæ essent iis civitatibus vicina, peterent, ut ibi facilius hostium injurias, & bellorum incommoda caverent. Id similiter a Cuprensi-  
bus Montanis factum est. Erat enim aptissimus hic locus editus ac præcelsus ad sedem tutissimam ejus populi reliquiis præstandam. Neque vero dubitan-  
dum

---

(a) *Vid. Append. n. III.*



dum est quin initio statim novum hoc oppidulum diligenter muniverint, quod posterioribus sæculis & muro firmissimo cum turribus per intervalla dispositis, & præalta fossa septum fuisse constat: & postquam in civitatem Æsinam est receptum, semper munitissimæ arcis loco est habitum, in eoque, quamdiu armorum usus in his regionibus Pontificiæ ditionis viguit, aliquem militum numerum præsidii causa Æsini (a) habuerunt. Sed præter castrum ipsum & natura loci, & arte munitum, locus erat intra ejus septum munitior, vulgo *il Cassaro*, cujus hodiedum nomen superest, ac nihil præterea. Est aliud, quo moveor, ut Massatium deficienti Cupræ Montanæ succrevisse judicem, cultus nimirum atque religio Massatiensium erga Divum Eleutherium, quem præcipui patroni loco habent. Sed ei tamen intra Massatium oppidum nec Ædem ullam, imo ne Aram quidem antiquitus dicatam fuisse comperimus. Una est ei Divo sacra Ædes antiquissima ad eum locum, ubi Cupram Montanam fuisse demonstravimus, quæ Plebis nomen adhuc retinet. Id autem argumento est Divi Eleutheri religionem in Massatium oppidum cum populi Cuprensis Montani reliquiis commigrasse.


## XXXVIII.

**S**Ed quandonam Massatii fundamenta jacta sint, si quis quærere instituat, is oleum, & operam perdet. Ego Massatii mentionem ante Pontificatum Inno-

---

(a) Ex Lib. Reformat. Æsii ad ann. 1425. 1427. &c.

Innocentii III. non reperio. Per eos enim dies adjuncta esse Ordini nostro oppidi Massatii Cænobia cum Palatio, Castrum Siscianum ex dimidia parte, & Castri item Saxonis (a) quartam partem, aliaque haud ignobilia Sacerdotia, & fundos in his locis amplissimos, idque ratum habitum esse per Innocentium III. uno & altero diplomate, ex Augustino Fortunio accipimus (b). Ad annum MCCXLIV. Massatienses suum habebant Consulem, a quo regerentur; ex quo apparet, ni fallor, tunc eos nondum ad Æsinos accessisse. Abbas S. Helenæ Benedictus eo anno Massatienses consulari nomine, & potestate regebat, quæ res multum est iis honorifica [c]. Consulum vero Massatiensium monumentum aliud observavimus non ita pridem in antiquo lapide, quem hic deteximus in Ædibus Antonii M. Bartholini, cum hac inscriptione:



Aliquis

(a) Il Sasso, ubi hodie dum Abbatia S. Helenæ multa possidet.

(b) Circa ea tempora accesserant Sacræ Eremitæ in agro Piceno Cænobia oppidi Massatii cum Palatio, medietas Castellii Sisciani, quarta pars castelli Saxonis. Palatium in urbe Æsina cum suis plateis. Villa nova: Pantanus in planicie Bosorii, (forte Rosorii, Rosora) & Siciani: Canonica S. Angeli de pinis: Villa Serre Madii de Ursq: Plebs S. Eleutherii munificentissimis donationibus cum omni jure & proprietate. Quibus omnibus Innocentius III. Pap. in generali Privilegiorum, ac libertatis Ordinis confirmatione Apostolicam auctoritatem interposuit. Dat. Romæ 4. no. Majas Indiæ. I. Et rursus 13. cal. April. anno II. Hist. Camald. l. 2. c. 23.

(c) Vid. Append. n. IV.

Aliquis fortasse dubitare posset, num qui in hoc lapide occurrunt Cavalerius, & Trasmundus Consules Massatienses ne an Æsini fuerint; sed cum Massatienses constet per eos dies suos habuisse Consules, ut ex allato Benedicli Abbatis S. Helenæ, & Consulis Massatiensis monumento; non video cur Æsinos Consules huc advocare oporteat. Consules autem multo ante illud tempus passim institutos fuisse constat in Italiæ Civitatibus, postquam sese in libertatem vindicare, vel saltem suis legibus vivere, suosque sibi magistratus creare cœperant. Ac aliis quidem civitatibus Consulem unum, aliis autem duos, aliis vero etiam plures præfuisse a Cl. Muratorio animadversum est (a). Quamquam non claras modo civitates, sed minora etiam oppida & castra hoc magistratum genus habuisse vel ex hoc Massatiensium exemplo intelligimus. Apud Fabrianum quoque, Castrum per eos jam tum dies non obscurum, duo consules erant exeunte sæculo XII., ut constat ex tabulis quas infra damus (b).

## XXXIX.

**S**unt in Archivo secretiore Cingulanorum testimonia a juratis testibus in judicio dicta, & in tabulas relata ad annum 1277. de juribus, & bonis Abbatiae S. Victoris in Arcione in Agro Cingulano, in quibus, ubi quorundam prædiorum fines assignantur, memoratur *via, quæ vadit ad Massatium,*  
*sive*

---

(a) Murator Dissert. med. ævi.

(b) Vid. Append. n. V.

*sive Pretolonem*, ut scripsit nuper ad me humanissimus Raphaellius, ex quo Massatii quod etymon sit, idem vir eruditus intelligi posse existimat. Ad eum enim modum quo Maceratae Picensi urbi clarissimæ ex maceriis Ricinæ nomen factum esse dicunt, quod de Macerata quoque Montis Feretri civitate confirmant, quam ex Pitini maceriis coaluisse ferunt; ita ex Cupræ Montanæ parietinis, & incondito lapidum & maceriarum cumulo, quem ex ea civitate diruta superfuisse oportet, *Pretoloni*, seu *Pretolonis* nomen conflare potuisse existimat, quod tandem in cognatum Massatii nomen defluerit. Nostres ejus vim vocis intelligunt, nec ab ea multum aliena est Massatii nominis vis & significatio, quæ priore illa obsolescente, deinceps ei loco hæsit.

## XL.

Quæ Massatii castri fortuna fuerit superioribus sæculis, quibus dominis paruerit, quæ prospera tulerit aut adversa, neque dicere possem etiam si vellem, deficientibus antiquis monumentis, neque id propositum est mihi ut dicam, qui non Historiam Massatiensem scribere aggressus sum, sed pauca hinc & inde carptim delibare, non satis nota, atque animadversa ab aliis, quæ ad te scriberem, amicissime Garatone, ut petitioni tuæ facerem satis. Quod si quæras quo loco nunc res Massatiensium sit, dicam paucis florere illam Æsinæ civitati copulatam & conjunctam. Sic enim Æsina civitas Massatii, aliorumque oppidulorum Agri Æsini, quæ sunt numero quindecim, habitatoribus

ribus communicata est, ut non voce tantum, ut alibi fere fit, sed reipsa unum corpus civitatis ex urbanis & oppidanis, ac vicanis istis coalescat. Nam & ejus pecuniæ, quæ publica est conjunctim ratio habetur (a), & pari numero ex urbe, atque ex his oppidis & vicis deliguntur, qui Magistratum in ipsa urbe gerant. Sed tamen qui primum dignitatis locum obtinet, Confalonarium appellant, is ex urbanis patriciis est, non quidem jure, aut lege aliqua, sed usu potius & consuetudine. Sequuntur Priores quinque, ex quibus duo ex urbe, reliqui ex agro esse debent; sed eadem omnium insignia, idem honor, quin & mensam communiter in Palatio Æsino habent [b]: ex quo apparet non mœnibus urbanis civitatem Æsinam contineri, sed æquissimo jure sparsam esse in castris, & oppidis totius agri Æsini. Ex his Malsatium cum primis illustre habetur, quod ad tria mortalium milia alit in oppido ipso, & agro adjacenti, & familias habet honestissimas, cum patriciis vicinarum civitatum familiis non amicitia solum, sed affinitate etiam conjunctissimas.

## XLI.

**I**Ntra oppidum unicum est monachorum cœnobium, quod nos obtinemus. A Divo Laurentio

---

(a) *Vetus querela est Comitatusium, sic enim appellant, contra Urbanos, quod istos dicant quoad hanc rem multa innovasse contra mores & statuta majorum; qua de re gravissimum judicium Romæ his ipsis diebus est exercendum.*

(b) *Statut. Æsin. l. 1. rubr. 17. & 39.*

tio nomen habet. Medio sæculo superiore [a] erectum fuit. Ejus tamen initia multo altius repetenda sunt. Hæc enim Ædes Divo Laurentio sacra antiquissima est, ejusque curator Ordinis nostri monachus Præpositus Castri Massatii in antiquis monumentis appellatur. Abstineo nunc jura, dignitatemque nostræ hujus Ecclesiæ persequi, quæ antequam Plebanus Divi Eleutherii intra oppidum ad Divi Leonardi se reciperet, princeps ac potissima apud Massatienses erat; sed abstineo, inquam, ne litium semina ferere videar, quarum ampla seges hinc aliquando est orta. Aucta est hoc anno familia hujus Monasterii duobus Lectoribus, qui publice Rhetoricen, Philosophiam, ac Moralem Theologiam doceant. Ad Divi Leonardi, præter Archipresbyterum, olim Plebanum dictum, haud exiguus est Sacerdotum numerus, qui Canonicorum instar sacra ibi decenter, ac religiose persolvunt. Est præterea intra oppidum ipsum Monasterium Monialium & religione & amplitudine maxime conspicuum. De quo, quoniam nihil impedit quominus libere dicam quæ sentio, juvat nonnulla in medium proferre, quæ ad hanc usque diem in tenebris jacuerunt.

## XLII.

**E**Rant olim apud Massatienses duo sacrarum virginum cœnobîa, alterum ad Divæ Catharinæ & Margaritæ extra castrum, alterum intra, quod a Diva Martha & Magdalena nomen habebat.

Utra-

---

(a) *Ad ann. 1657.*

Utraque adhuc Ecclesia superest, prima quidem integra & incorrupta, quam Divæ Catharinæ dicunt, altera vero, quæ Divæ Magdalenæ vulgo dicebatur, jamdiu exaugurata, & profanis usibus addicta. Sed ad Divæ Magdalenæ anno 1366. Moniales prorsus esse desierant, quod quæ ibi erant loco cessissent, sive quod omnis ejus loci familia paulatim defecisset. Eo factum est, ut quæ ad Divæ Catharinæ erant intra castrum recipi, & in vacuam earum sedem subire optaverint; propterea quod, cum extra castrum essent temporibus longe corruptissimis, cum omnia armis plena erant, earum domicilium militari licentiæ & perditorum hominum injuriis patebat; a quibus, ut sibi caverent religiosæ virgines, sæpe numero cogebantur e suis ædibus egredi, & perfugium sibi apud Massatienses intra castrum quærere: quod quamquam propter necessitatem honeste fieri videbatur, periculo tamen omnino non carebat, eratque contra rationem religionemque instituti ejus, quo erant adstrictæ. Anno itaque, quem diximus 1367., a Canonicis Regularibus Basilicæ Lateranensis, quorum jus summum erat in utrumque Monasterium, Monialibus, quæ ad Divæ Catharinæ erant, commigrandi copia facta est intra castrum Massatium ad Divæ Magdalenæ iis legibus, iisque conditionibus, quæ in diplomate hac de re edito continentur (a), eaque potissimum ut deinceps, quamquam unicum futurum erat Monasterium, utriusque tamen conjunctim appellatio fervaretur, dicereturque impofterum SS. Catharinæ

---

(a) *Vid. Appnd. n. VI.*

rinæ & Margaritæ, Marthæ & Magdalenæ. Sed unum tamen ex his nominibus apud vulgus obtinuit, atque ad hanc usque diem non aliam, quam ex Diva Catharina, appellationem habuit.

### XLIII.

**S**Ed novam hanc sedem non admodum diu Moniales istæ tenuerunt. Ad annum enim 1448. annis nimirum octoginta duobus, postquam intra castrum Massatium admissæ fuerant, apud Septempedanos novum sibi domicilium comparaverant, duabus exceptis, quæ reliquarum consilium improbantibus alio se abduci non siverant [a]. Eo enim anno Procurator Canonorum Lateranensium Gaspar Bononiensis Stephano Antonii Plebano SS. Clementis & Benedicti, aliisque una piis hominibus potestatem fecit construendi Ecclesiam Divæ Catharinæ in oppido S. Severini in ea regione, quæ ex Divo Francisco nomen habet [b], prope domum a Monialibus Divæ Catharinæ ex castro Massatio habitatam: qua nimirum Ecclesia Moniales egebant ad munia religionis obeunda, quamque Divæ Catharinæ potissimum dicatam voluerunt, ne pristinam collegii sui patronam una cum domicilio deferere viderentur [c]. Ex eo apparet vel eo ipso anno, vel paulo ante Massatium ab iis Monialibus esse relictum, ut sese apud Sanctoseverinates reciperent; neque

---

(a) Domna Guidolina, & Domna Francisca. Ex tabulis Archiv. S. Catharinæ Massatii.

(b) In Quarterio S. Francisci. Ibid.

(c) Actum in dicta Terra S. Severini A. 1448. Ibid.



neque enim credibile est potuisse illas admodum diu carere Æde sacra, in qua divina officia persolverent. Ceterum quæ causa eas impulerit ad hoc consilium capiendum compertum non habeo: eandem tamen puto quæ intra castrum Massatium adegerat, bellorum tumultus & incendia; per eos enim dies, ut cum maxime, Picenum bello & seditionibus conflagrabat, & Massatium ipsum non semel obsellum captumque est.

## XLIV.

**A** Nno 1477. Sanctoseverinates Virgines nostræ ex Massatiensibus factæ, cum inopia rei familiaris premerentur, a Lateranensibus postularunt, ut quæ res, quæque bona Monasteriorum SS. Catharinæ, & Magdalenzæ ex castro Massatio pene jam dirutorum fuerant, suo Sanctoseverinati Monasterio adjudicarentur. Egit id Romæ cum Canonicis Lateranensibus Liberatus Bartellius vir clarus Sanctoseverinatum apud Sedem Apostolicam Orator [a]; cumque Lateranenses annuissent [b], ejus rei perficiendæ negotium mandatum est Stephano

F

Anto-

---

(a) Per eximium Decret. Doctorem D. Liberatum de Bartellis de S. Severino Reverendissimi D. D. Cardinalis Mediolanensis Auditorem & Capellanum, & Terræ S. Severini Oratorem. *Ex Diplom. Canonico Lateran. in eodem Archiv. S. Catharinæ Massat.*

(b) Cum auctoritate, & consensu Reverendissimi in Christo P. D. Mariani Dei & Ap. Sedis Gratia Episcopi Glanadaten. Reverendissimi in Christo P. D. D. Latini tituli SS. Joannis & Pauli S. R. E. Card. de Ursinis Sacrosanctæ Basilicæ Lateranen. Archipresbyteri, Vicarii Generalis. *Ibid.*

Antonii Ecclesiæ Sanctoseverinatis Priori, ea imprimis conditione adjecta, ut duabus Monialibus, quas apud Massatium mansisse diximus, alimenta suppeditarent, quoad viverent [a]. Sed quantum hæc Lateranensium deliberatio valuerit, haud satis intelligo. Anno enim 1502. a Lateranensibus ipsis video Monasterium Massatiense SS. Catharinæ & Magdalenæ, in quo antea Abbatialis dignitas bellorum causa extincta fuerat, in Prioratum esse erectum: eo scilicet consilio, ne locum antiqua religione commendatum penitus dirui, & everti contingeret. Primus, qui Prioratum hunc obtinuerit, Benedictus Maccius fuit ex nostris Camaldulensibus, ut ex Lateranensium Diplomate intelligimus [b]. Massatienses autem vero simile est, cum iniquo animo ferrent suum illud Monasterium sublati Monialibus ad excidium properare, ejusque redditus ac bona omnia alio esse conversa, apud Lateranenses egisse, ut aliqua ratione ei malo succurrerent, eaque de causa ejus Monasterii curatorem, Prioris nomine esse constitutum. Vivebat adhuc ad eum annum 1502. una ex duabus iis Monialibus, quas ad Divæ Catharinæ in castro Massatio, ceteris abeuntibus, mansisse diximus, mandatumque est novo Priori, ut eam honeste religioseque aleret. Verum ego primum & postremum Benedictum Maccium puto fuisse, qui Prioratum hunc obtinuerit, si quidem vel ipse obtinuit ac gessit; neque enim dubito quin Moniales nostræ ei institutioni intercesse-

---

(a) *Ibid.*

(b) *Append. n. VII.*

cesserint. Nullum certe nec ejus Prioris, nec cuiuspiam qui in ejus locum successerit, memoria extat. Et quoniam anno 1542. Moniales nostræ, ut paulo post dicemus, R. Pontificem adierunt contra Gentilem quendam Delphinum jura ac bona Monasterii SS. Catharinæ, & Magdalenæ, quæ ad sese pertinere dicerent, injuria occupantem, ex eo, ni fallor, evincitur ejus Prioratus institutionem irritam fuisse. Sed quid, quod neque apud Sancto-severinates perpetuum fuit istarum Monialium domicilium? Tandem enim ad primævam sedem in castro Massatio redierunt: quod quo anno, quæ de causa factum sit, omnino me latet. Ad annum 1542. nondum rediisse constat, eo enim anno adhuc in oppido S. Severino degentes, Paulum III. Romanum Pontificem appellarunt contra Gentilem quendam Delphinum, qui nescio quid ex bonis Monasterii SS. Catharinæ & Magdalenæ ex castro Massatio, quæ ad se pertinerent, contra jus fasque occupaverat; cujus causæ cognitio per Pontificem Petro Vorstio commissa est [a]:

## XLV.

**S**ed quamquam de anno non constet, quo ad Massatienses redierunt; tamen dubitare non licet quin earum reditus Sæculo XVI. decurrente contigerit. Id enim apparet ex tabulis & libellis sane plurimis, in quibus domesticæ rationes describuntur, quorum ingens numerus est in earum Ar-

F 2.

chi-

---

(a) Ex tabulis in Archiv. S. Catharinæ.

chivo, inde usque ad nostram ætatem; sed nihil tamen est ex quo certa epocha earum reditus constitui possit. Post illud tempus ita augeri cœpit in dies Monasterium istud, ut & opibus, & Monialium numero, & ædificiorum splendore atque amplitudine, & quod caput est opinione pietatis & religionis florentissimum evaserit. Illud autem per mirum mihi videtur, quod cum primævum hujusce Monasterii institutum Benedictinum esset, idque diutissime perseveraverit etiam cum apud Sanctoseverinates translatus fuerat, ut constat ex tabulis ejus Archivi, in quibus semper est adscriptum *Ordinis S. Benedicti*, postea tamen non solum ab Benedictino instituto recesserunt Moniales istæ, sed nullus apud eas cultus erga Divum Benedictum relictus sit, atque adeo nulla prorsus primævi instituti memoria. Nunc enim Franciscana sub Regula militans, & constitutiones quasdam peculiare habent ab Alexandro Fidelio Episcopo Æsino ad annum 1698. compositas. Sed de hisce Monialibus satis multa.

## XLVI.

**J**Uvat nunc paucis dicere de iis Monasteriis, quæ sunt intra Massatiensium fines. Ex his notissima est Eremitus quam Cryptarum vocant, quam incolunt Eremitæ nostri Camaldulenses Montiscoronæ. Pertinebat hic locus ad Sacram Eremitum Camaldulensem, eumque tandem obtinuit B. Paulus Justinianus, qui prima ibi jecit suæ Montiscoronensis familiæ fundamenta [a]. Locus natura inamœnus,

---

(a) Vid. Luc. Hispan. In Hist. Romualdina.

nus , atque adeo plane inhospitus & desertus est , in ima valle undique confragosis rupibus circumclusa , si eam partem demas quæ ad meridiem spectat , sed Eremitarum tamen ædiculæ , & universa ædificia , quæ in ipso ejus vallis sinu , ubi modica agri planities æquata est , admodum eleganter pro Eremitarum more constructa sunt ; nec hortus deest diligentissime excultus , non ad commodum dumtaxat Eremitarum , sed ad speciem quoque , ut facile appareat arte & industria nativum loci horrorem asperitatemque esse victam . Extant etiamnum antiquæ cellulæ in topho excavatæ , quas Justinianus , primique ejus Instituti sodales incoluerunt , quasque , & propter naturam loci , & propterea quod angustissimæ sunt supra quam dici possit , latibula ferrarum , vel mortuorum sepulcra potius dixeris , quam vivorum hominum habitacula . Hinc Cryptarum nomen ei loco factum ,

## XLVII.

**P**Aulo supra Eremum hanc situm est notissimum Cœnobium , quod Divi Francisci alumni incolunt , quos Reformatos vocant , vulgo *'la Romita* , alias Eremitorium S. Jacobi , seu Prioratus de Mandriolis in antiquis monumentis appellatum . Istud etiam nostrorum Camaldulensium fuit ad annum usque 1451 . Aliquanto ante eum annum Martinus V. [a] eum in locum voluerat Fratres ejus Ordinis ,

F 3

nis ,

(a) Ex Lit. Apostolica D. Jacobo de Marca inscriptis in Archiv. ejus Convent. Incip. Injunctum nobis officium .

nis, quos ante dixi, inducere partim ut eis gratiam aliquam referre videretur, propter incredibiles labores, quos nonnulli ex eo Ordine susceperant, in extirpandis Fraticellianæ sectæ surculis, per Picenum late pullulantibus, partim ut commodius ejus sectæ reliquiis, quæ circa Massatium, & vicina loca confederant, plane delendis & extinguendis incumbere possent; suntque ea de re Litteræ Apostolicæ ejus Pontificis ad Fratrem Jacobum, hoc est divum Jacobum, quem vulgo de Marchia appellant, qui omnium acerrimus fuit in iis hæreticis profligandis. Sed negotium tamen confectum non est, nec Camaldulenses loco cesserunt; obnitente maxime ejus loci Priore Venantio Nicolai ex oppido Saxoferrato Monacho Camaldulensi, quem ajunt aliquandiu cum Divo Jacobo de Marchia habitasse, eique partem ædium suarum permisisse, sed negasse tamen liberam earum possessionem (a). Verum cum Massatiensis populus id maxime optaret, ut ejus Ordinis Fratres apud se haberet Nicolaus V. Martini successor, anno 1449. litteris ad Massatienses datis [b], quibus pium hoc illorum desiderium magnopere commendat, Ecclesiam Eremiti de Mandriolis, & ædes adjacentes Minoritibus adjudicat. Sed non propterea Prioris Venantii animus fractus est. Is iterum suum jus tueri, ac rem ducere instituit, quoad Nicolaus idem Priorem Venantium amovit, ac dignitate privavit, & ejus Ecclesiam cum ædibus, & adjacentis agri portione ad olerum ferren-

---

(a) Ex Monument. Mss. ejus Canon.

(b) Dilectis filiis incolis & habitatoribus nostri Castri Massatii sal. & Apostolic. benedic. piis fidelium votis, &c. Dat. Fabriani ann. 1449.

rendorum, & lignandi usum Fratribus attribuit; nulla tamen infamiae nota Priori Venantio iniusta, & reliquis bonis, quae ad eum Prioratum pertinebant, Venantio ipsi, & Ordini nostro relictis, ut constat ex diplomate Pontificio; cuius particulas aliquot infra dabimus [a].

## XLVIII.

**F**loruerunt in eo Cœnobio viri duo sanctitate illustres, quorum corpora in Ecclesia adservantur. Utrique idem nomen Joannes, idemque, ut fama est, Franciscanum institutum. Alterum B. Joannem de Fabriano, alterum autem de Massatio appellant. Sed posteriorem hunc verosimilius iudico Camaldulensem fuisse. Obiit enim ann. 1399. apud Eremum de Mandriolis in quodam specu, ubi is domicilium sibi elegerat pœnitentiæ studio adductus. Constat autem Franciscanos per illud tempus nondum in eum locum migrasse: idem suspicatus est Papebrochius, qui hujus Beati viri res gestas protulit ad diem XX. Aprilis [b]. Istud ipsum confirmari posse videtur ex antiqua pictura in coetili quodam laterculo, sive orbiculo, quem videre licet in claustro ejus Cœnobii, ubi Venerabilis Eremita Barbatus, & alba cuculla cum nigro caputio indutus exhibetur, stans in ipso aditu obscuri specus, atque ut intelligas suum ibi domicilium habuisse, brevi catenula constrictus vicino arboris trunco alligatur.

F 4

gatur.

(a) In Append. n. VIII.

(b) Acta SS. Ms. Apr. ad diem cit.

gatur. Quæ omnia egregie quadrant in Beatum Joannem Eremitam, alba autem vestis Camaldulensem fuisse demonstrat. Pertinet etiam ad agrum Massatiensem Monasterium S. Mariæ in Serris, sive de Serra, nunc Abbatia S. Angeli nuncupatum, quod Camaldulenses nostri ab antiquissimis temporibus obtinuerunt, eratque olim ex Diœcesi Auximana, nunc qua nescio de causâ ad Ælinam spectat. Ejus Cœnobii moderator Prioris nomen antiquitus gessit, tum Abbas est dictus, ut ex pluribus monumentis patet, quæ tum in Archivo secretiore Ælinorum, tum in nostro Fabrianensi ad Divi Blasii, tum denique in publico Massatiensium vidimus, in quibus tamen nihil memoratu dignum occurrit. Ejus mentio est non uno in loco apud Augustinum Fortunium (a). Leo X. ejus Cœnobii bona nostro S. Severii Monasterio in Urbe Perusio adjudicavit (b). Ecclesia tamen, & contiguæ Monachorum Ædes adhuc supersunt; ac Ecclesia quidem vetustissima structura est, & veteri more unicuique Altare habet, sub quo corpus Beati Angeli Martyris, ex Ordine nostro, religiose servatur. Sanctum vulgo appellant, indeque Abbatia S. Angeli nomen factum est. Cum vir sanctus Fraticellianam sectam strenue insectaretur, ab iis hæreticis occisus est; qua de re gravissime reprenduntur ab Divo Jacobo de Marchia in Dialogo, quem per eos dies contra Fraticellianæ superstitionis homines conscripsit; quod quidem viri sanctissimi testimonium

---

(a) *Hist. Camald. l. 2. c. 42. &c.*

(b) *Ex Constit. Leonis X. inter Privileg. Camald.*



nium hic libenter afferimus ad Beati Angeli sanctitatem comprobendam, & quoniam Dialogus iste ineditus est, nonnulla ex eo excerpere juvat scitu non injucunda de ejus sectæ hominibus (a). Beati Angeli corpus actum aliquando est ut ad Divi Laurentii in Oppido Massatio transferretur, quemadmodum Andreas Vallemanius Abbas ex Ordine nostro per litteras Papebrochium monuerat, qui de B. Angelo agit ad diem VIII. Maii (b). Sed qua de causa id perfectum non sit, ignoro. Hunc Beatum Monachum Massatiensem fuisse tradunt ex familia Urbana, quæ paulo ante hanc memoriam extincta est: ea de re est aliquid etiam in Mabillonii schedis (c) a Martene editis. Mitto dicere de Monasterio nostro Camaldulensi S. Martini de Accolla (d), de Ecclesia S. Mariæ de Alvareto (e), de Hospitali S. Bartholomæi (f), deque aliis sacris Ædibus perantiquis agri Massatiensis, ne videar, ut  
ajunt,

(a) Vid. Append. n. IX.

(b) Acta SS. VIII. Maii.

(c) Veter. Script. & Monum. T. VI. pag. 1439.

(d) Fortun. Histor. Camald. l. 2. c. 7. &c.

(e) Antiquissima Ecclesia Parochialis nunc diruta, prope eum locum ubi olim Cupra Montana. Seculo XV. unita erat Præposituræ huic nostræ S. Laurentii, ut ex tabulis pluribus publici Archivi Massat. Seculo autem XIV. amplitudine, & populi copia reliquarum Parochiarum, quæ apud Massatienses sunt, potissima erat, ut constat ex tabulis agrariis Civitatis Æfine in codice membranaceo, vulgo il Catastro Vecchio, ante annos, ut minimum quadringentos scripto, quem nuper vidimus in Archivo secretiore Æfinorum.

(f) Hospitale S. Bartholi de Castro Massatii memoratum legimus in laudatis tabulis agrariis. Ibi fuisse crediderim ubi hodieum Ecclesia est Divi Bartholomæo sacra extra Massatium.

ajunt, laureolam ex mustaceo quærere. Et jam ve-  
reor, mi Garatone, ne te harumce nugarum tæ-  
deat; me enim video in rerum levissimarum inve-  
stigatione nimium fuisse. Sed nisi te ista delectant,  
cavebis imposterum ne tale aliquid a me petas, in  
quo præstando, dum id ago, ne diligentiam meam de-  
sideres, non esse tibi molestus non possim. Vale.

Dabam iterum in Oppido Massatio Agri Æfini  
Kal. Sextil. M. DCC. XLVIII.



# A P P E N D I X

## V E T E R U M

### M O N U M E N T O R U M .

#### I.

..... ab incarnatione ejusdem millesimo ducentesimo octuagesimo sexto. Quartadecimæ Indictionis XIII. m. Julii. Pontif. D. Honorii ..... Venerab. Patris D. Federici Iporien. electi Marchiæ Anconitanæ Rectoris. Simon Maſtei de Achola univerſitatis hominum ejusdem ..... & hominum Felonicæ Eccleſiæ Romanæ fidelium, ſicut per publica instrumenta manu Bantii Notarii ibidem confecta, conſtat ad hoc negotium per ..... Procurator humiliter ſupplicavit, ut cum homines ipſi ob ſui debilitatem & tenuitatem, & nobilium vicinorum potentiam inimicitias ... nequeant pacifice, nec ſecure morari, quatenus eis habitationem, & incolatum Caſtri Staſuli eligendi, & aſſumendi, & ſe ſuaque domicilia ad ipſum locum .... facultatem & licentiam impartire dignetur. Rainaldus quoque Rainaldi Angeli, præfatæ univerſitatis, cujus Procurator eſt, nomine ejusdem Domino Rectori cum inſtantia ſupplicavit, ut ..... licentiam & facultatem indulgeat, offerens ſe ipſamque Univerſitatem ſuam paratos pro dictis hominibus ſalaria, & aſſecta Romanæ Eccleſiæ ..... dictarum Univerſitatum, & hominum utilitas, ſine ipſius

ipſius Eccleſiæ dapno, quin potius cum ejus honore & utilitate in hoc negotio ..... jam dictas, & in iis tam Eccleſiæ prædictæ, quam Univerſitatum, & hominum prædictorum evidentem utilitatem ac diligenter ſuper hoc deliberatione ..... annuit poſtulis. Quod prædictarum Univerſitatum Aſcolæ, & Felonicæ homines, quemadmodum petebatur, ſe ſuaque domicilia ..... Caſtri Univerſitatis, eos in ſuos incolas, municipes, & habitatores perpetuos patron. ſalvo Eccleſiæ Romanæ jure & ſine ipſius præjudicio ..... Staſſuli dictorum locorum Univerſitates uniantur, & unum cum ea corpus exiſtant, ejusdemque libertatibus & honoribus gaudeant &c. Quæ ad majorem ..... Dominus Rector ſigilli ſui duxit appenſione muniri.

..... apud Montem Ulmi in palatio Communis dicti loci. &c. &c.

..... auctoritate Not. & Cameræ dicti D. Rectoris nunc ſcriba hiis omnibus interfui.

*Ex autographo, temporum injuria corrupto, in Archiv. ſecr. Staphyl. Communicavit eruditus Jo. Franciſcus Lancellottus Staphylanus.*

*Quoniam nullus poſthac erit fortasſe de his dicendi locus, juvat hic nonnulla addere de Accolanis, deque antiquis Accolæ Dominis. Non anno ſolum 1251. fœdus iſtum eſt inter Accolæ Dominos, & Æſinam Civitatem, quemadmodum in ſuperiore Epistoſa dictum eſt, ſed multo ante Arloſus Thomæ Comititis, & Thomas ejusdem Arloſi filius, Accolæ Domini, ſocietatem cum Æſinis inierant. ad annum 1201. iis conditionibus, quæ extant in publicis tabulis ea de re conſectis, quaſque nuper cum hac prælo jam*

*jam committerentur, in secretiore Æsinorum Tabulario vidimus in Lib. †. II. Inprimis autem Accolæ Domini Arloctus, & Thomas promiserunt adjuvare homines dictæ Civitatis, & esse cum eis in omni guerra, quam habuerint, contra omnes eorum inimicos, & facere pro eis guerram, cum oportuerit, excepto Imperatore, ejusque ceteris nunciis, exceptis etiam Auximanis civibus, & hæredibus Gilberti. Porro qui anno 1251. societatem cum Æsina Civitate inivit Corralutius Domini Rogerii, Thomæ, Arlocti dicitur in tabulis sua loca citatis. Ex quo apparet quinam, haur. brevi sane temporis intervallo, Accolanis imperitarint; Thomam scilicet Comitem, tum Arloctum, deinde Thomam alterum, mox Rogerium, denique Corralutium, qui cum sine liberis obierit, Accolani eo imperio soluti, Staphylanis sese deliderunt, ut suo loco diximus. Sed Thomas, quem quasi hujus gentis auctorem hic habemus, Comes quidem, appellatur, at ejus successores eam honoris, & dignitatis appellationem non usurpant, quod non mirabuntur eruliti, qui ex more nostrorum temporum antiqua omnia non æstimant. Vid. Murat. Antiquit. Med. Ævi. ubi de Comit.*

## II.

*D. Tit. SSæ † in Jrblm } Apostolicæ Sed. Legat.  
presb. Card. Firmanus }*

**P**RUDENTIBUS viris Prioribus & Consilio & Comuni Castri Staffuli demoliendi, diruendi, & solo æquandi Rocchettam Acculæ sitam in Territorio dicti Castri tamquam inutilem, ut experien-  
tia

tia sæpenumero didicit , & damnosam locis vicinis (a) , tenore præsentium licentiam concedimus , & omnimodam facultatem . Non obstantibus in contrarium &c. Dat. in S. Severino die VII. Aug. M.CCCCXLVII.

*Ex eodem Archiv. Communicavit idem Lancellosus.*

### I I I.

**I**N nomine Patris , &c. ab incarnatione D. N. J. C. anni Nongentesimi septimi die XI. mense Decembre per indictione decima . Actum in Camerino in ipso Monasterio de Natabene . Manifesta est me Ageltruda olim Imperatrice filia quondam Principis de Benevento relicta veste Religionis induta , quæ fuit relicta quondam bone memorie Domni Guidoni Imperatori &c. Propterea volo , judico , atque pro anima mea , & de prædicto viro , atque filio meo , id est in Monasterio S. Eutitii Confessoris , quod situm est in loco , quod dicitur Campoli , hoc est Curtem meam in Territorio Hefinata , locum qui dicitur *Rubelliano* , cum Oratorio B. Petri Apostoli & cum casis , arilis , & terris , & vineis , & omnia ad ipsa cum dicta curte pertinentes , vel subjacentes &c. adque pro anima mea dispono in ipso antedicto Monasterio , ubi modo Dominus Major Abbas esse dignoscitur cum aliis fratribus

---

(a) A. 1414. Jo. Asponus Brizinoriensis Staphylanorum Prætor capitali sententia damnavit Præfectum arcis Accolæ , & milites septem , qui ibidem presidii causa erant , ob latrocinia , quibus circumjecta itinera infesta habebant . Ex tab. in eodem Archiv.

tribus regulariter viventes, hoc autem tenore, ut ibi Petrus presbiter in ipsa Ecclesia B. Petri Apostoli habitum & obedientiam habeat, sicut voluerit, sicut ceteri Fratres Monaci in ejusdem Monasterium diebus vitæ suæ &c. *Extat apud Muratorium in Antiqu. Medii Ævi Tom. V. pag. 511.*

## IV.

**A**D. MCC.XXXXIV. indictione II. D. Petrus Abbas Athalmenfis in cunctis Monasteriis de Ordine Camaldulensi in Anconitana Marchia constitutus a Venerabili D. G. Priore Camaldulensi visitator & reformator ordinatus præcepit D. Benedicto S. Elenæ Abbati & suis Fratribus Monacis, & Conversis per veram obedientiam & Spiritus S. Virtutem, & sub pœna excommunicationis de veritate sibi dicenda causa visitationis tam de spiritualibus quam de temporalibus &c.

Item interrogavit si fecit vel fecit fieri sacramentum fidelitatis Imperatori vel suis nuntiis. Respondit quod Benvenutus in Valle S. Clementis pro Imperatore Vicarius constitutus venit personaliter ad Monasterium prædictum, & omnibus Fratribus congregatis ex parte Imperatoris & Regis Henrici præcepit tam Abati, quam aliis fratribus ut sibi pro Imperatore recipienti fidelitatem jurarent, & obedire, ac observare deberent mandata D. Imperatoris. Et statim dictus Benvenutus confutavit tam Abati, quam aliis Fratribus sacramentum: affirmantes ipsi sacramentum sicut ipse Vicarius iis denunciabat. Verumtamen in fine sacramenti non

eos permisit manus super librum. ponere, &c.

Item interrogatus eodem modo (*idem Abbas*) si fuit rector & consul castri Massacii anno præterito, quando homines dicti Castri ab Ecclesia erant excommunicati, & in omnibus observabant mandata Imperatoris contra libertatem Ecclesiæ. Respondit quod sic &c. *Ex Archivo S. Blasii Fabriani Casp. S. Elena.*

## V.

**I**N nomine &c. Ann. MC. nonagesimo nono V. Id. Febr. Indic. II. Dominus quidem Ioannes Ecclesiæ S. Crucis Fontis Avellanæ Prior præsentibus & volentibus dompno Joanne Præposito Ecclesiæ S. Mariæ Vallis Meragi, & Dompno Raynaldo, & Dompno Trasemundo ejusdem Ecclesiæ Monachis, dedit atque concessit imperpetuum Vizzoni & Ballono Consulibus Fabriani nomine totius universitatis castri Fabriani recipientibus omnes homines, quos, habent Ecclesia S. Crucis, & Ecclesia Vallis Meragi a Sentino usque ad castrum Fabriani nomina quorum hæc sunt &c. Actum in Ecclesia S. Venantii de Fabriano &c. Ego Fabianus notarius &c.

*Ex codice membran. Archiv. secreti Fabrian. il Libro rosso pag. 120.* Communicavit humanissimus Basilius Bartholi Fabrianensium a secretis.

## VI.

**C**apitulum & Canonici Sacrosancte Lateranensis Ecclesiæ dilectis in Christo vobis Abbatibus Monialibus & Conventui Monast. Sanctarum  
Ca.



Catharinæ, & Margaritæ de Burgo Castrî Massatii  
Æxin. Dyocesis membri dictæ Lateranensis Ecclesiæ  
Salutem in Domino. Decet ex superiorum pietate  
procedere subditos ac membra ipsorum per intimæ  
dilectionis affectionem protegere; ad quod tanto  
magis vires pertendere debent, quanto ex tempo-  
rum corruptionibus pericula imminet graviora.  
Cum igitur sæpius in Marchiæ Anconitanæ provin-  
cia nonnullæ undique collectæ gentes pestiferæ at-  
que nefandæ sub quodam societatum vocabulo pul-  
lulent, ipsamque provinciam magno terrore concu-  
tiant, Urbes & alia oppida prædis, incendiis ac  
ruinis subjiciant, nullo habito dignitatis seu reli-  
gionis discrimine, imo sacratissimas Deo dicatas  
virgines, ut filii Belial in Dei contemptum ad  
impudicos actus deducere, ac ipsas violare non me-  
tuunt. Et propterea quampluries hujus metu coa-  
ctæ, prout talia pericula imminebant, vestrum mo-  
nasterium egrediebamini, & intus Castrum præfatum  
per sæcularium personarum domos, & habitacula  
latitantes, nefandarum gentium vires & crimina in-  
honeste quodammodo vitabatis, quod vobis, nedum  
aliis, etsi ad majus malum fugiendum fieret, illicit-  
um tamen ac incongruum videbatur. Quapropter  
nobis humiliter supplicastis quatenus Ecclesiam sive  
monasterium Sanctarum Mariæ Magdalenzæ & Mar-  
thæ situm intus præfatum Castrum Massatii, mem-  
brum nostræ Lateranensis Ecclesiæ, ipsique imme-  
diate subjectum, vobis concedere dignaremur, ut  
cum talis imminet necessitas fugiendi, ad ipsam Ec-  
clesiam sive Monasterium honeste ac fiducialiter re-  
currere valeatis. Nos itaque vestris supplicationi-

G

bus

bus inclinati ipsasque justissimas fore putantes, tenore præsentium vobis Ecclesiam sive Monasterium Sanctarum Mariæ Magdalenæ & Marthæ situm in ipso Castro Massacii nostræ Lateranenſi Ecclesiæ immediate subiectum, ac ejusdem Ecclesiæ membrum cum omnibus juribus & pertinentiis suis, vobis concedimus & donamus, atque Monasterio vestro præfato unimus, & unitum esse volumus, cum potestate in eodem vobis concessa, ædificandi & reparandi, moniales recipiendi, Abbatissam, & Sacerdotes eligendi, & alia faciendi quæ pro ejus salute de jure fieri posse licite dignoscuntur. Dummodo per vos, una libra ceræ, quæ pro censu nobis per ipsam Ecclesiam, & personas ejusdem solvi anno quolibet consuevit, per vos similiter, prout fuit hætenus solitum, persolvatis. Reservata nobis & successoribus nostris potestate de electa seu eligenda in Abbatissam, & Capellanis ibi eligendis canonice per nos confirmationem, & institutionem faciendi in tempus a jure concessum, videlicet infra XV. dies: visitationem quoque, correctionem & reformationem in dicto Monasterio seu Ecclesia, quam visitationem cum contigerit per nos vel successores nostros fieri, teneamini unum nostrum cum uno socio, seu procuratorem recipere cum duobus equis, & uno famulo per unum diem tantum, & non ultra; ac etiam salvis, & reservatis omnibus & singulis per actis & tenoribus factis habitis & firmatis inter Dominos Canonicos & Capitulum Ecclesiæ Lateranensis supradictæ ex una parte, & dictas Dominam Abbatissam, moniales, & conventum monasteriorum supradictorum, ac patronorum dicto-

dictorum Monasteriorum seu Ecclesiarum supradictorum ex alia parte. Suscipientes auctoritate qua fungimur in hac parte vigore privilegiorum dictæ nostræ Lateranensis Ecclesiæ per Summos Pontifices concessorum, dictam Ecclesiam, seu Monasterium prædictum cum omnibus membris suis, Abbatissam, Moniales, Capellanos & servitores qui pro tempore fuerint, ipsius Monasterii seu Ecclesiæ, si fuerint, possessiones, bona, & jura, quæ eis ratione legatorum concessionum & donationum, seu alio quovis modo justo titulo poterunt pertinere. Constituentes procuratores & yconomos nostros & dictæ Lateranensis Ecclesiæ Ven. viros D. Presbyterum Sanctum Ecclesiæ S. Mariæ ... de Urbe præsentem & recipientem, & D. Presbyterum Silvestrum Rectorem Ecclesiæ S. Salvatoris in pisol. de dicta urbe, ac Valentem Palmarutii de dicto Castro Massatii absentes tanquam præsentem, & quemlibet ipsorum in solidum ad investiendum & ponendum vos & vestrum quamlibet vice & nomine dicti vestri Monasterii, & pro successoribus vestris in vacuam & corporalem possessionem de prædicto Monasterio seu Ecclesiâ SS. Mariæ Magdalænæ & Marthæ, & de omnibus & singulis connexis & dependentibus ab eodem. In quorum omnium testimonium & evidentiam plenioris præsentem nostras litteras, seu præsens publicum Instrumentum fieri fecimus, & sigilli nostri Capituli juximus appensione muniri. Datum, & Actum in dicta Ecclesia Lateranensi. Sub anno a Nativitatis Domini Millesimo CCC.LX. sexto pontificatus domini Urbani PP. quinti. Indictione IV. mense Maii, die secunda & præsentibus

his testibus, scilicet: Domino Joanne Petri Bertæ, & Domino Silvestro Cardelli civibus Romanis, & beneficiatis dictæ Lateranen. Ecclesiæ Domino Presbytero Petri Thomaxii de Nagnia, & Rainaldo Putii Carelli de Monte Leontis familiaribus Domini Thomæ de Montenigro Canonici Lateranensis ad prædicta vocatis & rogatis.

Ego Bartholomæus Domini Petri Sancti B. Dei gratia Imperiali auctoritate Notarius prædictis omnibus interfui &c.

*Ex autographo apud Monial. S. Catharinæ Massatii.*

## VII.

**C**apitulum & Canonici Sacrosanctæ Lateranen. Ecclesiæ dilecto nobis in Christo Venerabili Domno Benedicto Ioannis Petri de Maccis Ordinis Camaldulensis salutem &c. Vitæ & morum integritas &c. Itaque sicut accepimus annis superioribus Monasterium SS. Catherinæ, & Magdalenæ Ordinis S. Benedicti de Burgo Maxatii Æfinæ Diocesis nobis & nostre Sacrosanctæ Lateranensi Ecclesiæ immediate subiectum, & causa bellorum Abbatiali dignitate alias inibi per nos & Capitulum nostrum suppressa, & in Monasterium Monialium S. Severini Camerinensis diocesis ac etiam nobis subiecto translata cum suis mobilibus & immobilibus pro majori parte, & in dicto Monasterio Monialium SS. Catherinæ & Magdalenæ una tantum ex dictis Monialibus supersisterint, volentes indemnitati supradicti Monasterii providere ne ob diuturnam vacationem in demolitionis periculum adveniat, pro-  
ut

ut ad præsens devenit; capitulariter congregari in loco solito una cum Reverendissimo P. D. D. Juliano Episcopo Bretonorien: Reverendissimi in Christo P. & D. D. Juliani Episcopi Hostien. S. R. E. Card. S. Petri ad Vincula Majoris Pœnitentiarii nostræ Sacrosanctæ Lateranen. Ecclesiæ Archipresbyteri, Vicario Generali, dictum Monasterium, sicut præmittitur in perpetuum Prioratum erigimus, &c. tibi que Domno Benedicto Jo: Petri de Maccis Ordinis Camaldulensis administrationem Prioratus hujusmodi concedimus in perpetuum &c. cum omnibus dependentiis suis, cum honoribus & oneribus, videlicet in altera earum Ecclesiarum singulis diebus festivis celebrandi, & dictam unam, quæ sola ex ceteris Monialibus superstes inibi degit, quoad vixerit honeste, & religiose alendi &c. Dat. Lateran. A. D. MDH.

*Ex Archivo pub. Massatien. lib. C. pag. 253.*

## VIII.

**N**icolaus Episcopus Servus Servorum Dei. Dilectis filiis Guardiano & Fratribus Ordinis Fratrum Minorum in Territorio Massatii Æsinæ Diocæsis commorantibus salutem & Apostolicam benedictionem.

Sacræ religionis studium sub qua mundanis abdicatis illecebris tum additione voluntariæ paupertatis virtutum Domino in humilitatis spiritu devotum impenditis famulatum, & sedula vestra in favorem fidei catholicæ merita promerentur, ut Apostolica sedes vos & vestrum Ordinem favoribus con-

foveat, & spiritualibus gratiis prosequatur, in his præsertim per quæ vestris verbo & exemplo fidelium animæ ab hæresis laqueis eripi possint, & cultus Divini numinis valeat adaugeri. Cum itaque nos nuper abominabilem sectam quorundam malignantium hominum fratrum, seu Fraticellorum de opinione vulgariter nuncupatorum, quæ procurante factore malorum operum in Massatii Æsinæ Diocesis, & nonnullis aliis Castris, Terris, Villis, ac locis Marchiæ nostræ Anconitanæ, proh dolor! invaluisse dicitur, de medio tollere, ac illorum fluxum pestiferum, ne virus insanabile, & perpetuum nocumentum Fidelium cordibus inferre possent, totis viribus extinguere cupientes, post nonnullos auctoritate nostra contra quosdam ex dictis pestiferis hominibus habitos processus, sperantes quod per vestram laudabilem ac religiosam vitam, & fructuosas, quas sub singulari observantia viventes, incessanter ad populos funditis prædicationes, vestro ministerio omne hæresis hujusmodi fermentum expurgabitur ..... unam domum vestri Ordinis pro vestro usu & habitatione in præfato castro Massatii, seu in ipsius Territorio in loco utique ad id habili & idoneo fundari & construi decreverimus; & sicut accepimus, si Prioratus S. Jacobi delle Mandriole Ordinis Camaldulensis in Territorio dicti castri Massatii consistens, quem dilectus Filius Venantius Nicolai de Saxoferrato ipsius Prioratus Prior obtinet, & qui cum illius Ecclesia in ruina existit, ipsam videlicet Ecclesiam cum structuris circa illam si quæ sunt, & spatium terræ seu nemoris quantitatis seminaturæ, unius sarcinæ grani,

grani, mensuræ illarum partium pro fundatione, & constructione domus hujusmodi .... vobis concederetur; vos inibi unam domum cum Ecclesia Campanili, & aliis necessariis officinis de nonnullis bonis quorundam hæreticorum, alias per nos, seu auctoritate nostra damnatorum, vobis ad fundationem hujusmodi assignantis, ac Christi fidelium eleemosynis fundaretis ... in dicto Prioratu præfatum Ordinem Camaldulensem extinguimus, dictumque Venantium ab illo, absque tamen alicujus infamiae nota, quoad Ecclesiam videlicet, & circa illam structuras, & spatium terræ, seu nemoris prædicta dumtaxat amovemus; vobisque assignamus &c. Dat. Romæ apud S. Petrum A. D. Inc. MCCCCLI. Prid. Non. Jul. An. V. *Ex apographo in hcc nostro Archivo ad Divi Laurentii Massat.*

## IX.

**D**ialogus Divi Jacobi de Marchia inter Catholicum & hæreticum hujusmodi habet initium. Vidi ascendere dal mare una bestia, che aveva sette capi &c. *In eo Dialogo pag. 19. & 20. hæc habentur de Fraticellis hæreticis:* Quando lo SS. nostro Papa Nicolò V. nell' anno 1449. del mese di Novembre mandò lo Venerabile Padre Frate Giovanni da Capistrano, e me Frate Iacomo della Marta, de l'Ordine de li Frati Minpri, a ridurre alla vera Fede li Castelli già Eretici (a),  
cioè

---

(a) *Cave putes usum Catholicæ religionis in his locis extinctum*

cioè lo Massaccio, Majolata, lo Pojo (*Potium Cupræ*), e lo Mergo &c. li quali castelli mediante la divina gratia sono ridusti a lo gremio de la S. Chiesa, & ad unitade de la Santa Fede, abjurata omne Eresia ne le nostre mane; trovammo ne la campana del dicto Castello de Majolata lettere scolpite, che dicevano così: Anno Domini millesimo quadringentesimo decimonono, tempore Fratris Gabrielis Episcopi Philadelphiae Ecclesiae Pastoris Fratrum Minorum Minister Generalis. Jesus. Maria. Franciscus. Ecco lo vostro Papa.

*Idem vir Sanctus pag. 21. ejus sectæ vanitatem ex eo probans quod nulla apud eos signa & miracula a Deo ostendantur, ita inquit.* Nella vostra Chiesa, la quale dicete essere voi medesimi, mai ce s'è trovato esser fatto miracolo alcuno, salvo in contra de voi, in vostra detestatione, confusione: tacciamo de' tutti. Ma pure quando alcuno de voi la nostra justitia li fa bruciare, acciochè se concorde l'odore de la santità del corpo a quello dell'anima, le vostre carne, come carne molto putride, abominevolmente puzzano: siccome se vidde, e sentisse per certa experientia a Fabriano, stando lì presente Messere lo Papa Niccolò V. & essendoci bruciati lì certi Eretici, per tre dì loro intollerabile fetore occupò tutta la Cittade, intanto-

*Etum fuisse. Confluxerant huc Fraticelliane heresis reliquiae, nec dubium est quin ea contagione mortales aliqui affecti & corrupti fuerint, sed major saniorque pars eam pestem non sensit, ut cum aliis rationibus, tum vero maxime probari potest ex literis Apostolicis Nicolai V. Communi Massatiensium inscriptis, quas supra laudavimus.*



tantochè stando io in lo Convento de S. Francesco, de longo da lo loco, ove erano stati arsi per tre dì continui, me abominò quella lpro intollerabile puzza. *Ac paulo post inquit*: voi in cento trenta anni, e più (a), mai non avete convertito alcun dottore, ne uomo di alcuna scientia, o pure alcuna persona notabile, se non solamente alcuni villani rustici da Majolata, da lo Mergo, e da lo Pojo, e parte di quelli de lo Massaccio (b), e non altro se non alcuni semplici ignoranti, & alcu-

(a) *Furere coepit hæc pestis sub initium Pontificatus Joannis XXII. auctoribus potissimum nonnullis pseudominoritis. Vid. Rainaldus ad ann. 1318. Ex hoc auctore, aliisque, qui de hisce hæreticis egerunt, unusquisque intelligere potest quam longissimo a Massatii finibus eam pestem ortam esse, ut merito videndi sint qui secus judicant.*

(b) *Hinc etiam liquido apparet quinam ex Massatiensibus in Fraticelliorum errores prolapsi sunt, rustici nimirum homines, rudes & ignobiles. Per eos autem dies ut cum maxime florebat Massatium & incolarum frequentia, & splendore atque opibus, multique ex ejus castri primoribus, qui magistratum tunc temporis in civitate Ætio gesserunt, nobiles appellantur in Libris, quos Reformationum appellant. Sed hic dicere videtur vir Sanctus non alios homines a Fraticellis corruptos fuisse, quam rusticos aliquot ex his locis, quod non ita intelligendum est quasi non alibi maxime ea pestis grassata sit. Variis enim locis jam inde ab Ludovici Bavari temporibus pululaverat, ac radices altius egerat. Itaque ut verissimum sit extremas ejus sectæ reliquias huc tandem consfluxisse, & rusticos aliquot homines ex his locis corrupisse; illud certe per falsum est de universa ea secta, quæ neque his locis exorta est, & multo latius pervagata est, quam sit ultimus iste Piceni recessus; nec puto magis esse ignominiosum his locis quod ea contagio hucusque pervenerit, quam gloriosum quod hic deleta, & extincta sit.*

alcune feminucce con vostre menzogne, e fallacie.

*Denique sic Dialogum suum concludit pag. 22.*  
Ecco la carità de la vostra Chiesa : queste sono le opere de la vostra pietade : questi sono li miracoli de la vostra santitade. Cristo in Croce con li suoi Santi chiama , perdona , perdona ; e voi con li Giudei chiamate , mora , mora ; occide , occide : siccome faceste del Beato Angelo dell' Ordine de li Camaldoli, lo quale perseguitava la vostra maladetta setta. La cui morte , come degno sacrificio offerto a Dio per defensione de l'immacolata fede di Cristo lo ha justamente accettato , & dimostrato con evidenti segni de molti miracoli essere a Dio sommamente grato. Prego adunque lo piissimo Signore con tutto lo core , che in eterno & oltra si degni illuminarvi a conoscere la veritade, la immacolata & vera fede de Jesu Cristo benedetto in sæcula sæculorum Amen.

## FINIS.

*Pag. 11. post secundam lineam banc addito*

FILIO. DIVI. TRAIANI

*Pag. 76. lin. 7. civitate , leggito oppido.*

Re-

Reverendissimus Dñus S. Pisaurensis Ecclesiæ Canonici Sigonfredius videat & referat. Pisauri 23. Augusti 1748.

J. B. Passerius Vic. Gen.

De mandato Reverendiss. Domini Joannis Baptistæ Passerii Vicarii Generalis Pisauri, ego Joannes Antonius Sigonfredius Sanctæ Pisaurensis Ecclesiæ Canonicus, ac Proth. Apost. vidi Epistolam, cujus titulus *De antiqua Picentum Civitate Cupra Montana, cum Appentice Veterum Monumentorum, Alm. R. P. Mauri Sartii Monaci Camaldulensis*, nihilque in ea fidei, principibus, ac bonis moribus adversum inveni, quare ipsam luce dignam judicavi. In quorum, &c. Dat. Pisauri Kalendis Septembris 1748.

*Attenta supradicta relatione imprim. quoad Nos.*

J. B. Passerius V. G.



De

De mandato adm. R. P. M. Mazzolii Vicarii S. Offit. in Pisauri Civitate legi Epistolam cujus titulus *De antiqua Picentum Civitate Capra Montana, cum Appendice Veterum Monumentorum, Alm. R. P. Mauri Sartii Monaci Camaldulensis*, nihilque contra fidem, bonisque moribus inveni, ideo existimo typis mandari posse, &c.

Datum in Conventu Ser. Mariæ de Pisaurò die 25. Septembris 1748.


*Fr. Philippus Maria Brioli Conf. Tb. in Civi. Pisau.*

*Attenta supradicta attestatione imprimatur.*


*F. Hyacinthus Ant. Mazzolius Vic. S. O. Pisauri.*



VA1  
1541493







VS  
XX